


انالوم باتكا
سدقملالا



The Holy Bible in the Hassaniyya language of Mauritania:

(Bible) سديقملالا انالوم باتكا

المقدس مولانا الكتاب

The Holy Bible in the Hassaniyya language of Mauritania: المقدس مولانا الكتاب (Bible)

copyright © 2024 Pioneer Bible Translators

Language: (Hassaniyya)

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 6 Sep 2025 from source files dated 13 May 2025

e6f0c3d8-299e-5aac-95be-a59aa7e65092

Contents

التكوين سفر	1
-----------------------	---

سفر التكوين

بداية العالم

- 1 فالبداية خلق مولانا العالم. وهاذي هي الطريقة الي خلقو بيها:
- 2 فالبداية كانت لارض ماهي منتظمة ولا فيها شي، وكانت الظلمة امغطية الماء، وروح مولانا يحوم فوقو.
- 3 وكال مولانا: يخلق النور. واخلق النور.
- 4 وخرص مولانا النور وشاف النور زين. وافصل مولانا النور عن الظلمة.
- 5 وسما مولانا النور انهار، وسما الظلمة ليل. وعاد ليل وعاد امع الصباح. وكان ذاك هو اليوم لأول.
- 6 وكال مولانا: تخلق قبة امبين المياه اياك اتكسم المياه شور قسمين.
- 7 وخلق مولانا قبة وافصل المياه الي تحت القبة عن المياه الي فوقها. واخلق هذا.
- 8 وسما مولانا القبة السما. وعاد ليل وعاد امع الصباح. وكان ذا اليوم الثاني.
- 9 وكال مولانا: يجتمعو المياه الي تحت السما كاملين فابليدة وحدة اياك تظهر التراب. واخلق ذا.
- 10 وسما مولانا هاذي التراب لارض، وسما بل امنين اجتمعو المياه لبحور. وخرص مولانا وشاف ذاك كامل زين.
- 11 وكال مولانا: تعطي لارض النباتات الي فيهم لبذور، ويخلق اصدر رافد الثمار الي فيهم لبذور بكل أنواعهم اعلى لارض. واخلق ذا.
- 12 ووخظت لارض النباتات الي فيهم لبذور بكل أنواعهم، واعطت املي اصدر رافد اثمار فيهم لبذور من نوعهم. وخرص مولانا وشاف ذا كامل زين.
- 13 وعاد ليل وعاد امع الصباح. وكان ذا اليوم الثالث.
- 14 وكال مولانا: يخلقو لأنوار فقبة السما اياك يميزو النهار عن الليل ويعودو علامات يحددو لأيام والسنين ولعياد.
- 15 ويخلقو أنوار فقبة السما اياك يظو اعلى لارض. واخلق ذا.
- 16 وخلق مولانا لأنوار لكبار لأثنين: خلق النور لأول لكبير اياك يعود فانهار، وخلق النور الثاني الصغير اياك يعود فالليل، وخلق مولانا النجوم املي.
- 17 ودار مولانا هاذو لأنوار فقبة السما اياك ايظو اعلى لارض،
- 18 واجعلهم مولانا هوما المسؤولين عن انهار وليل وهوما الي يميزو النور من الظلمة. وخرص مولانا وشاف ذا كامل زين.
- 19 وعاد ليل وعاد امع الصباح. وكان ذا اليوم الرابع.
- 20 وعاكب ذا كال مولانا: تمتلا المياه بياسر من المخلوقات الحيين، واتعود فم اطيور اطيور امبين لارض والسما.
- 21 وخلق مولانا وحوش لبحور لكبار، وكيف ما خلق المخلوقات الحيين كاملين الي املان منهم الماء، خلقهم من كل نوع.
- 22 وخلق املي كل اطيور بريشاتو من كل نوع. وخرص مولانا هاذا وشافو زين.
- 23 ودار مولانا فيهم البركة وكال: اثمرو وانثارو ويمتلاو مياه لبحور بالمخلوقات، ويثارو الطيور اعلى لارض.
- 24 وعاد ليل وعاد امع الصباح. وكان ذا اليوم الخامس.
- 25 وكال مولانا: تعطي لارض مخلوقات حيين من كل نوع: من حيوان يربا وزواحف وحيوانات نخلا من كل نوع. واخلق ذا.
- 26 وخلق مولانا الحيوانات نخلا من كل نوع، والحيوان الي يربا من كل نوع، وكل حيوان يزحف اعلى التراب من كل نوع. وخرص مولانا وشاف ذا زين.
- 27 وعاكب ذاك كال مولانا: المخلكو لإنسان اعلى شي من صيفاتنا، وسلط مولانا لإنسان اعلى حوت لبحر واطيور السما والحيوان الي يربا وحيوان نخلا اعلى التراب واعلى كل حيوان يزحف اعلى التراب.

- 27 وخلق مولانا لإنسان اعلى شي من صيفاتو، اعلى شي من صيفاتو خلجهم راجل وامرة.
 28 ودار مولانا فيهم البركة وكال: اثمرو واكثرو وعودو ياسرين وسيطرو اعلى لارض، واتسلطو اعلى حوت لبحر واطيور السما وكل شي يتحرك اعلى لارض.
 29 وكال مولانا: اراني اعطيتكم كل اصدر اعلى وجه لارض رافد ابذور. اعطيتكم كل صدرية رافدة لكم ثمار اياك توكلوهم.
 30 يغير لحيوانات لارض واطيور السما كاملين وكل الحيوانات الصغيرة اللي تزحف وكل مخلوق فيه روح، اتعود النباتات اطعامها. واخلق ذا .
 31 وخرص مولانا هاذا وشافو زين حته. وعاد ليل وعاد امع الصباح. وكان ذا اليوم السات.

2

بداية العالم

اخلاية العالم- القصة الثانية

- 1 وبهاذي الطريقة اوفوا السماوات ولارض وذا كامل اللي فيهم.
 2 وعاكب يلين اوفوا مولانا من شغلتنو كامل، استراح فاليوم السابع .
 3 وبارك مولانا اليوم السابع وكال اعلنو مخلصلو، ببلي اوفوا فيه من خلق العالم.
 4 هاذي هي قصة السماوات ولارض وقت اخلايتهم: اليوم اللي خلق الله تعالى لارض والسماوات
 5 ما كانت أي اربعة خالكة اعلى لارض، ولا كان املي أي اصدر فات انبت، ببلي الله تعالى مافات فهاذا الوقت مشا اسحاب اعلى لارض، ولا كان فات اخلق أي آر كاج يحرث التراب.
 6 يغير كان يوظ من لارض فهاذا الوقت عين من الما تسكي التراب.
 7 وعاكب ذاك خلق الله تعالى الراجل من التراب وانفخ فاخنافرو الحياة وعاد الراجل نفس حية.
 8 وعاكب ذاك اغرس الله تعالى اصدر فلبيدة زينة فعدن فالشرق وفم عاد عايش الراجل اللي خلق.
 9 ونبت الله تعالى من لارض كل نوع من الصدر الزين و صالح للوكيل. وكانت فوسط هاذي لبليدة الزينة صدرية تعطي الحياة وصدرية اخرا تعطي معرفة الصالح والطالح.
 10 وكان فم نهر يمشي فهاذي لبليدة الزينة اللي فعدن اياك يسكيها، وكان هاذا النهر يتفرعو منو 4 فروع.
 11 اسم لأول هو فيشون وهو اللي يوظ احذا ارض الحويلة كاملة بل امنين فيه الذهب.
 12 والذهب اللي فم من نوعية زينة، وفم املي ازين ليخور واحجار العقيق.
 13 واسم الثاني هو جيحون وهو اللي يوظ احذا ارض كوش كاملة.
 14 واسم الثالث هو دجلة ويوظ شرق آشور. والرابع اسمو الفرات.
 15 واكبط الله تعالى الراجل ودارو فهاذي لبليدة الزينة اللي فعدن اياك يحرثها ويرعاها.
 16 ووصا الله تعالى الراجل وكالو: اتكذ توكل اللي تبغي من الصدر ذي لبليدة اللي فعدن.
 17 يغير ذيك الصدرية اللي تعطي المعرفة امين الصالح والطالح، لا توكل منها، ببلي الوقت اللي توكل منها لاهي اتموت .
 18 وكال الله تعالى: ماهو زين ببكا الراجل وحدو، ولذاك لاهي انخلكلو معين اياك يشارك حياتو امعا.
 19 وخلق الله تعالى من التراب كل حيوان فلحريثة وكل اطيور السما. وعاكب ذاك جابهم كاملين للراجل اياك يشوف سلاهي
 يسمي كل واحد منهم. وكل مرة يسمي واحد من المخلوقات يعود ذاك اسمو.
 20 وسما الراجل الحيوانات كاملين اللي يرباوا واطيور السما كاملين وحيوانات لخللا كاملين ، يغير ما اجبر امينهم واحد يعاونو ويشابهلو.

- 21 ورّكّ الله تعالى الرجل اركّاد امتين، وفوق اركّادو، اكبّظ الله تعالى ظلعة من اظلوغو وغطا بلها بالجل .
 22 وعاكب ذاك خلّك الله تعالى من الظلعة اللي اكبّظها من الرجل امرة وكدمالو.
 23 وكال الرجل: ظرك ، هاذي اعظم من اعظامي ولحمة من لحمي، ولاهي اسميها امرة بيّلي انكبّظت من امرئ.
 24 ولذا السبب يخلي الرجل بوه وأمو ويلتصك باعيالو، ويعودو عايلة وحدة.
 25 وكانو الرجل واعيالو كلهم عريان، يغير ما كانوا يستحاو.

3

بداية العالم

الذنب لأول

- 1 وكان الحنش هو أمكر حيوانات لخلا اللي خلّك الله تعالى. وكال للهرة: حكّحك كالكّم الله تعالى : لا توكلو من أي صدرية فهادي لبليدة الزينة ؟
 2 وكالت مرة للحنش: ابدي انكّو نوكلو من احدج الصدر كامل اللي فهادي لبليدة،
 3 يغير الصدرية اللي فوسط هادي لبليدة الزينة، كيط كالكنا الله تعالى: لا توكلو منها ولا اتمسوها اياك ما اتموتو.
 4 وكال الحنش للهرة: ابدي مانكم لاهي اتموتو.
 5 يغير الله تعالى يعرف اعلنكم الوقت اللي توكلو منها لاهي اتعود عندكم معرفة اجديدة واتعودو كيفت الله تعالى اتميزو امبين الصالح والطالح.
 6 وشافت مرة اعلن الصدرية زينة للويكل وتجذب شورها العين، ومرغوب فيها بسبب اللي تعطي من الحكمة لحد يوكل منها .
 7 وانفتحو عينهم، وفضنو اعلنهم عريانين. وخيطو اورك صدرية التين وصنعو لروسهم لباس يغطي عورتهم.
 8 ومن فم سمعو صوت الله تعالى ماشي فهادي لبليدة الزينة وقت مشي الريح، واتروقو الرجل واعيالو من الله تعالى امبين اصدر هادي لبليدة.
 9 وعيط الله تعالى للراجل وكالّو: انتا امنين؟
 10 وكال الرجل: اسمعت صوتك فهادي لبليدة ونخلعت بيّلي آنا عريان، واتروق عنك.
 11 وكالّو الله تعالى: من كالك اعلنك عريان؟ اترك كلت من الصدرية اللي انهيتك عن توكل منها؟
 12 وكال الرجل: مرة اللي امعاي ، اعطاني من احدج الصدرية وكلت.
 13 وعند ذاك كالك الله تعالى للهرة: ذا اللي عدلتي شنهو؟ وكالتلو مرة: الحنش احتال اعليّ وكلت من احدج ذيك الصدرية.
 14 وكال الله تعالى للحنش: بيكلي انتا عدلت ذاك، اتعود ملعون أكثر من المخلوقات لخرين كاملين. وكل أيام حياتك لاهي تحي اعلي كرشك، ولاهي توكل التراب،
 15 ولاهي اندير عداوة امبينك وامبين مرة وامبين نسلك ونسلها. لاهي يبعج نسلها راسك وانتا لاهي اتعضو فالعركوب.
 16 وكال الله تعالى للهرة: لاهي انكّو اوجاع حملك. وبالألام لاهي تبراى أولادك، ولاهي تخدمي راجلك، ولاهي يسود اعليك.
 17 وكال الله تعالى للراجل: انتا اسمعت اللي اقترحت اعليك اعيالك وكلت من الصدرية اللي انهيتك عن توكل منها. ولذا لاهي نلعن لارض، ولانك لاهي اتعود توكل منها يكون بالك والتعب كل أيام حياتك.
 18 ولاهي اتبتلك الشوك وينيتي، ولاهي توكل من اصدر الحريثة .
 19 اتحصل اطعامك باعرك جبهتك ، يلين ترجع للتراب اللي اوخلّكت منها. من التراب اوخلّكت وشور التراب لاهي ترجع.
 20 وسما آدم اعيالو حواء بيّلي لاهي اتعود أم البشر كاملين.

- 21 واصنع الله تعالى لباس من جل حيوان لآدم واعيالو، ولبسولهم.
- 22 وكال الله تعالى: اراعيه عاد لإنسان كيف واحد منا فالتمييز امبين الصالح والطالح، وظرك عاد يكد يد ايدو ويكبظ من احدج صدراية الحياة ويوكل منها ويعيش إلى الأبد.
- 23 وصاعو الله تعالى من لبليدة الزينة اللي فعدن اياك يحرث التراب اللي اوخلط منها.
- 24 وعاكب يلين صاع لإنسان، دار مولانا فجبهة شرق عدن نوع من الملايكة اسمهم الكرويم اللي كانوا رافدين سيف من ناريزكبن اياك يحرس اطريك اللي واعدة صدراية الحياة.

4

بداية العالم

أول مرة يموت آرڤاج

- 1 وعاش آدم اعيالو حواء وحملت منو وخالاتلو اطفيل اسمو قايل وكالت: ارزقني الله تعالى باطفيل.
- 2 وعاكب ذاك خلات خوه هايل. وكان هايل راعي لغنم، وقايل كان مزارع.
- 3 وعاكب فترة كدم قايل لله تعالى قربان من خيرات لارض.
- 4 وهايل كدم اشبه اللي عندو من اكبر لغنم واسمنها. واپكل الله تعالى قربان هايل،
- 5 يغير قربان قايل ما يكلو. وانفكع قايل حته، وعاد وجهو امعبس.
- 6 وكال الله تعالى لقايل، اعلاش تنفكع؟ اعلاش يعبس وجهك؟
- 7 يلين اتعدل شي صالح نكلو، والين اتعدل شي ما هو صالح لاهي يعود ذنبك اكريب من بابك ويدور يتحكم فيك، ولا تخليه يتحكم فيك.
- 8 وكال قايل لخوه هايل: وهاي جاي ثمشو شور انخلوات. وفالوقت اللي كانوا فيه هوما لأثنين فانخلوات، اهجم قايل اعلى خوه هايل ونگلو.
- 9 وكال الله تعالى لقايل: امنين خوك هايل؟ وكالو قايل: ما نعرف. آنا اثرى حارس لخوي؟
- 10 وكال الله تعالى: شنو اللي عدلت؟ دم خوك يزويكي من التراب.
- 11 من ظرك لارض لعنتك وفتحت فيها لدم خوك اللي اكلتو بايدك.
- 12 يلين تحرث التراب ماهي لاهي تعطيك شي. وانتا لاهي اتعود واقد بلا مسكن.
- 13 وكال قايل لله تعالى: عقابي امتن من انكد نتملو.
- 14 انتا اليوم صعنتي من لارض اياك نخنتي من حضرتك وانعود ابلا مسكن فالدنيا، وأي آرڤاج يجبرني يكلني.
- 15 وكالو الله تعالى: ابدي، اللي يكلك لاهي اتعاقبو باسبع مرات عقابك. ودار الله تعالى علامة اعلى قايل اياك ما يكلو حد يجبرو.
- 16 وامشا قايل عن محضر الله تعالى واسكن فارض نود اللي شرق عدن.
- 17 وعاشر قايل اعيالو وحملت وخالاتلو اطفيل اسمو حنوك. وكان قايل وقتها بيني مدينة، وسماها حنوك اعلى اسم ولو.
- 18 وحنوك اجبر إشيرو اسمو عيراد، وعيراد اجبر محويل، ومحويل اجبر متوشيل ومتوشيل اجبر لامك.
- 19 واتعرس لامك امع مرتين: وحدة منهم اسمها عادة ونخرا اسمها صلة.
- 20 وخالات عادة يابال وهو أول آرڤاج اسكن فلخيام واسرح لغنم.
- 21 واسم خوه يوبال وهو أول آرڤاج اخبط التيدنيت والنيفارة.
- 22 وصلة خلات توبال قايل وهو أول آرڤاج اصنع آلات من النحاس والحديد، واختر اسمها نعمة.

- 23 وكال لأمك لاعلياتو عادة وصلّة: يا عادة وصلّة اسمعو اكلامي يا اعليات لأمك، عدلو الي انكولكم: أنا اكلت راجل اجرحني وشاب اخبطني.
- 24 وبالتالي يلين يعود يخلص لقابيل 7 مرات لاهي يعود يخلص للامك 77 مرة.
- 25 وعاش آدم حواء مرة اخرا وخلاتلو اطفيل وسماتو شيث وكالت: ارزقني مولانا باطفيل اوخر بل هابيل الي كلو قابيل.
- 26 واجبر شيث اطفيل وسماه أنوش. وفذاك الوقت ابدوا الناس يعبدو الله تعالى.

5

بداية العالم

سلسلة نسب النبي آدم يلين النبي نوح

- 1 هاذا سجل مواليد آدم: اليوم الي خلق مولانا فيه لإنسان، خلپكو اعلى شي من صيفاتو.
- 2 وخلقهم راجل وامرة وباركهم وسماهم لإنسان.
- 3 والين عاد عند النبي آدم 130 سنة، اجبر ول يشابهو اعلى صيفاتو وسماه شيث.
- 4 وعاش آدم بعد اخلاكة شيث 800 سنة، واجبر فيها أولاد اخرين وامنات.
- 5 وكان آدم عندو 930 يلين اتوفا.
- 6 والين عاد عند شيث 105 سنوات اجبر أنوش.
- 7 وعاش شيث بعد ذاك 807 سنوات، واجبر فيها أولاد اخرين وامنات.
- 8 وكان عند شيث 912 سنة وقت وفاتو.
- 9 والين عاد عند أنوش 90 سنة اجبر قينان.
- 10 وعاش أنوش عاكب ذاك 815 سنة، واجبر فيها أولاد اخرين وامنات.
- 11 وكان عند أنوش 905 سنوات وقت وفاتو.
- 12 والين عاد عند قينان 70 سنة اجبر مهليل.
- 13 وعاش قينان بعد ذاك 840 سنة، واجبر فيها أولاد اخرين وامنات.
- 14 وكان عند قينان 910 سنوات وقت موتو.
- 15 والين عاد عند مهليل 65 سنة اجبر يارد.
- 16 وعاش مهليل عاكب ذاك 830 سنة، واجبر فيها أولاد اخرين وامنات.
- 17 وكان عند مهليل 895 سنة وقت وفاتو.
- 18 والين عاد عند يارد 162 سنة اجبر النبي إدريس.
- 19 وعاش يارد عاكب ذاك 800 سنة، واجبر فيها أولاد اخرين وامنات.
- 20 وكان عند يارد 962 سنة وقت وفاتو.
- 21 والين عاد عند النبي إدريس 65 سنة اجبر متوشالح.
- 22 وعاش النبي إدريس عاكب ذاك 300 سنة. كان متقي فيها مولانا، واجبر فيها أولاد وامنات.
- 23 وكان عند النبي إدريس فهذا الوقت 365 سنة.
- 24 وكان النبي إدريس متقي فيها مولانا. وعاكب ذاك اختفا النبي إدريس ببلي رفعو مولانا شورو.
- 25 والين عاد عند متوشالح 187 سنة اجبر لأمك.
- 26 وعاش متوشالح عاكب ذاك 782 سنة، واجبر فيها أولاد اخرين وامنات.
- 27 وكان عند متوشالح 969 سنة وقت موتو.
- 28 والين عاد عند لأمك 182 سنة اجبر اطفيل،
- 29 وسماه نوح وكال: هاذا الول يخفف عنا تعبنا والمشقات الي انعانوها فلارض الي العنبا الله تعالى.

- 30 وعاش لامك بعد اخلافة نوح 595 سنة، واجبر فيها أولاد آخرين وامنات.
 31 وكان عند لامك 777 سنة وقت وفاتو.
 32 والبن عاد عند نوح 500 سنة، اجبر سام وحام ويافث.

6

بداية العالم

الني نوح يستعد للطوفان

- 1 والبن ابدوا البشر يكثرو فلارض وخلقهم امنات،
 2 شافو الملائكة اعلن امنات البشر ازوينات وكبظوهم واتعرو امعاهم كيف ما ابغاو.
 3 وكال الله تعالى: روجي ما بيكا فلإنسان الزمن كامل بيبي هو إنسان فاني ومن ظرك ماهو لاهي يعيش أكثر من 120 سنة.
 4 ومن ذاك الوقت عاد فلارض لجبايرة بيبي الملائكة اتعرو امع امنات البشر وجبرو منهم أولاد. وكانو أولادهم هوما لجبايرة الي معروفين بالحرب من ذاك الزمن.
 5 وعاكب ذاك شاف الله تعالى اعلن شر لإنسان ازاد حته فلارض، واعلن رغبات لإنسان وافكار كلبو كاملين دائماً ماهم امسكمين.
 6 واتكدر الله تعالى حته فكلبو اعلنو خلق لإنسان فلارض.
 7 وكال الله تعالى: لاهي انفرق البشر الي خلقتهم من اعلى لارض، الناس امع الحيوان والمخلوقات الي يزحفوا اعلى اكروشتهم والطيور السما بيبي اتدمت اعلي خلقتهم.
 8 يغير النبي نوح ارضا اعليه الله تعالى.
 9 وهادي هي قصة النبي نوح: هو كان آرکاج صالح ومتقي مولانا من امبين أهل جيلو، ويعدل كل شي طلبو منو مولانا.
 10 واجبر اثلث أولاد هوما سام وحام ويافث.
 11 عادت لارض فاسدة عند مولانا وعاد فيها الظلم وشر لإنسان.
 12 والبن شاف مولانا هاذا الفساد الي خسر حياة كل البشر،
 13 كمال مولانا للنبي نوح: جات نهاية هاذا الزمن، ولاهي انفرق البشر كاملين من الوجود بيبي بسببهم امتلات لارض من الظلم. لاهي انبيدهم وانبيد لارض امعاهم.
 14 وعدل لراصك سفينة من لعمد لمتان، وابني فيها ابوت وادهنها بالطين من الكدما ومن النجر اياك الما ما يدخل فيها.
 15 وتبينها بهادي الطريقة: طول السفينة يعود 150 ميتر، وعرضها يعود 25 ميتر، وطولها اعلى الفولك يعود 15 ميتر.
 16 واتعدل فيها مغطاية يعود امبينها امع السفينة 50 سانيمتر، واتعدل فيها باب، واتعدل فيها ثلاثة طوابق، التحتاني والوسطاني والفوقاني.
 17 بيبي راعيني لاهي اتمشي طوفان اعلى لارض اياك انفرق كل مخلوق حي تحت السما. وكل شي اعلى لارض لاهي يهلك.
 18 يغير لاهي انعدل عهدي امعك وتدخل السفينة انتا وأولادك واعمالك واعليات أولادك امعك.
 19 وتكبظ امعك فالسفينة 2 من كل مخلوق اذكر ونيثي اياك يسلكو امعك:
 20 اثنين من كل نوع من الطيور ومن كل نوع من الحيوانات ومن كل نوع الحيوانات الي يزحفوا اعلى اكروشتهم اياك يحياو.
 21 واكبظ امعك كل شي ينتكل واتخزنو اياك يعودهم ويعودك الطعام.
 22 وعدل النبي نوح كل شي اطلب مولانا منو.

7

بداية العالم

مولانا يوسلك النبي نوح وعائلته من الطوفان

- 1 ومن فم كمال الله تعالى للنبي نوح: ادخل فالسفينة انتا وكل أسرتك، بيلى اجبرتك وحدك صالح فهاذا الجيل.
- 2 واكبط امعاك من كل نوع من الحيوانات لخلال اسبع اذكور واسبع ناثي، والحيوانات اللي ماهم احلال تكبظ من كل نوع أثنين من الذكور وأثنين من الناثي.
- 3 واملي تكبظ من كل نوع من الطيور اسبع اذكور واسبع ناثي اياك بيكا جنسهم اعلى لارض.
- 4 بيلى عاكب اسبعة أيام لاهي انمسي اسحاب اعلى لارض، ولاهي اتم ماشة مدة 40 يوم قليل وانهار، اياك انفرق كل مخلوق حي كط خلكتو من اعلى لارض.
- 5 وعدل النبي نوح كل شي اطلب منو الله تعالى.
- 6 وكان النبي نوح فهاذا الوقت عندو 600 سنة وقت امجي طوفان اعلى لارض.
- 7 وادخل النبي نوح فالسفينة هو وأولادو واعيالو واعليات أولادو اياك يسلكو من ما الطوفان.
- 8 ودخلو املي الحيوانات لخلال والحيوانات اللي ماهم احلال والطيور والحيوانات اللي يزحفو اعلى اكروشتهم.
- 9 وجاو للنبي نوح ودخلو فالسفينة اعلى شكل أزواج اذكر ونثي كيف ما اطلب مولانا من النبي نوح.
- 10 وعاكب اسبعة أيام جا الطوفان اعلى لارض.
- 11 فسنة 600 من حياة نوح فالشهر الثاني فاليوم 17 من الشهر، انفجرت المياه اللي كانت عميقة فالتراب وانفتحو ابواب السما.
- 12 ونزلت اسحاب اعلى لارض قليل وانهار مدة 40 يوم.
- 13 وفذاك اليوم نفسو ادخل النبي نوح فالسفينة هو وأولادو، سام وحام ويافث واعيال نوح واعليات أولادو الثلاثة.
- 14 وكان امعاهم من كل نوع من حيوانات نخلا والحيوانات اللي يربأو والحيوانات اللي يزحفو اعلى اكروشتهم والطيور.
- 15 من كل المخلوقات الحيين جاو للنبي نوح ودخلو فالسفينة اعلى شكل أزواج
- 16 اذكر ونثي من كل مخلوق كيف ما اطلب مولانا من النبي نوح. وعاكب ذاك اكفل الله تعالى باب السفينة.
- 17 وواصل الطوفان مشبه اعلى لارض مدة 40 يوم، وركب ما الطوفان السفينة فوك لارض.
- 18 وكانت المياه الياسرة اتواصل مشيها اعلى لارض والسفينة ماشة فوك الماء.
- 19 وانزادت المياه حته يلين غطت لكدا لكجار كاملين اللي تحت السما.
- 20 وواصلت المياه مشيها يلين الخك طولها اعلى الفوك اسبع امتار فوك لكدا لكجار.
- 21 وماتو كل المخلوقات الحيين اللي كانوا موجودين اعلى لارض من الطيور وحيوانات نخلا والحيوانات اللي يربأو والزواحف والبشر.
- 22 ومات كل مخلوق حي يتنفس اعلى لارض.
- 23 وفرق مولانا من اعلى سطح لارض كل مخلوق اسوا من البشر والحيوانات والزواحف واطيور السما، كاملين فرقو من لارض ولا ابكا ماهو نوح واللي امعاها فالسفينة.
- 24 وابكات المياه موجودة اعلى لارض مدة 150 يوم.

8

بداية العالم

القربان اللي كدم النبي نوح عاكب يلين وكيف الطوفان

- 1 ولا انسا مولانا النبي نوح وكل حيوانات نخلا والحيوانات اللي يربأو اللي امعاها فالسفينة، ومشا الريح اعلى لارض وبدات لارض اتمص الماء.
- 2 وكانت عين الماء لكبيرة اللي عميقة فالتراب انكفلت وابواب السما انكفلو، وكفت اسحاب الجاية من السما.

- 3 وارتفعت المياه عن لارض اشوي اشوي. وعاكب 150 يوم،
 4 فاليوم 17 من الشهر السابع، وكفت السفينة اعلى اكدا أراراط.
 5 وظلت المياه تنتكص يلين الشهر العاشر. وفاليوم لأول من الشهر العاشر ظهرو روس لكدا.
 6 وعاكب 40 يوم افتح النبي نوح الكوة الي عدل فالسفينة.
 7 ومشا اغراب واتم طير فوك لارض يلين بدات المياه تيبس عن لارض.
 8 وعاكب ذاك مشا النبي نوح احمامة اياك يشوف إلى عادت المياه يبست عن لارض.
 9 ولا اجبرت حمامة ابليدة تنزل فيها يبيل المياه مزالت امغطية لارض كاملة. ورجعت حمامة شور النبي نوح فالسفينة. ومد ايدو واحكمها ودخلها شورو فالسفينة.
 10 وحانا اسبعة أيام اخرين ومشا حمامة من السفينة مرة اخرا.
 11 ورجعت شورو امع اغروب الشمس رافدة نخشمها وركبة من صدراية الزيتون اجديدة. وافهم النبي نوح اعلن المياه مصتها لارض.
 12 وحانا اسبعة أيام اخرين وبعدين مشا حمامة ولا رجعتلو هاذي المرة.
 13 وفاليوم لأول من الشهر لأول من سنة 601 من حياة النبي نوح، فهذا الوقت كانت المياه بدات تيبس عن لارض. وارفع النبي نوح مغطية السفينة وشاف اعلن لارض تيبس حته.
 14 وفاليوم 27 من الشهر الثاني يبست لارض تماما.
 15 وكلم مولانا النبي نوح وكالو:
 16 اوخط من السفينة اتنا واعمالك وأولادك واعليات أولادك.
 17 ووظ كل نوع من المخلوقات الحين الي امعك، من الطيور والحيوانات والزواحف اياك يتوالدو فلارض ويكثرو.
 18 وخط النبي نوح وأولادو واعيالو واعليات أولادو
 19 والحيوانات والزواحف والطيور والمخلوقات الي يتحركو اعلى لارض خاظو كاملين من السفينة بأنواعهم.
 20 وابنا النبي نوح مذبح لله تعالى واكبط واحد من كل الحيوانات لخال والطيور لخال واذبحهم وكدمهم لله تعالى كيفت قربان محروك اعلى المذبح.
 21 واكبلهم الله تعالى وارضا وكال الله تعالى امينو امع راصو: ماني لاهي نلعن لارض مرة اخرا بسبب لإنسان امع اعلن ميول كلبو شرير من صغرو. ولاني لاهي نكل كل مخلوق حي مرة اخرا كيف ما عدلت.
 22 ومادامت لارض موجودة لاهي يعودو فيها مواسم لخرية والحصاد، البرد والحمان والصيف والشتا والنهار والليل. ولاهي يتم هذا هو حالها إلى الأبد.

9

بداية العالم

بداية العهد امين مولانا والبشر عاكب الطوفان

- 1 وبارك مولانا النبي نوح وأولادو وكلمهم: اثرو واكثرو واملاو لارض.
 2 حيوانات نخلا الي فلارض واطيور السما والزواحف وحوت لبحر كاملين لاهي يخافو منكم ويرهبوكم، يبيل مولانا اعطاكم السلطة اعليهم.
 3 وكيف ما اعطيتكم الصدر نلخر كيفت اطعام لكم، طرك عاطيكم الحيوانات.
 4 يغير لا توكلو أي لحم مزال الدم فيه يبيل الدم هو الي يمثل الحياة.
 5 يغير دمكم انتما لاهي انعاقب اعليه كل حيوان سفكو، واملي كل إنسان لاهي نكلو اعلى حياة خوه لإنسان يبيل هو كيفتو.
 6 ومن يسفك الدم لإنسان لاهي ينسفك دمو، يبيل مولانا خلقت لإنسان اعلى شي من صيفاتو.

- 7 يغير انتوما اثمر واثارو فلارض.
- 8 وكلم مولانا النبي نوح وامعاه اولادو وكالو:
- 9 انا ظرك لاهي انعدل عهدي امعكم وامع نسلكم اللي جاي اوراكم.
- 10 وامع كل مخلوق حي امعكم من الطيور والحيوانات اللي يرباؤ وكل حيوانات لخلا، وكل اللي خاظ من السفينة وكل مخلوق حي اعلى لارض.
- 11 ولاهي انعدل عهدي امعكم ولا تبت لاهي نسمح باعلن اتفرق مياه الطوفان كل مخلوق حي مرة اخرا، ولا تبت لاهي نسمح باعلن الطوفان يجي ويخسر لارض مرة اخرا.
- 12 وكال مولانا: هاذي هي علامة العهد اللي لاهي انعدل بيني وبينكم وكل مخلوق حي امعكم فكل لاجيال،
- 13 لاهي اندير خط الندية فالسما ويعود علامة العهد امبيني وامبين لارض.
- 14 والين امشي السحاب فوق لارض ويظهر خط الندية فالسما،
- 15 تتذكر العهد اللي امبيني وبينكم وامع كل نوع من مخلوق حي، ولا تتحول المياه شور طوفان يهلك كل مخلوق حي.
- 16 والين يظهر خط الندية فالسما لاهي انشوفو وتتذكر العهد اللي لاهي يدوم إلى الأبد امبيني وامبين المخلوقات الحية كاملين اللي اعلى لارض.
- 17 وكال مولانا للنبي نوح: هاذي هي علامة العهد اللي عدلتو امع كل مخلوق حي اعلى لارض.
- 18 هاذو هو ما اولاد نوح اللي خاظو من السفينة: سام وحام وياث. وحام هو بو كنعان.
- 19 هو ما اولاد النبي نوح الثلاثة ونسلهم هو اللي انتشر فكل جهات لارض.
- 20 واشتغل النبي نوح فلحريثة واحرث اصدر العنب اللي يعدل منو عصير العنب.
- 21 واشرب من عصير العنب واسكر واتعرا نخيتمو.
- 22 وشاف حام بو كنعان عورة بوه وامشا وعلم اخوتو.
- 23 واكپظو سام وياث حولي وداروه اعلى اكافهم ودخلو شور بوهم النبي نوح فانخيمتو، وهو ما كانوا ماشين اعلى لورا وسترو عورة بوهم. وكانو وجوهتهم صادين اعلى الجبهة لخرا اياك ما يشوفو عورة بوهم.
- 24 والين اوعا النبي نوح من سكر واعر ف اللي عدلو ولو الصغير،
- 25 كال: ملعون كنعان ولاهي يعود احقر من اعبيد اخوتو.
- 26 وكال املي: يا ربي والهني بارك سام واجعل كنعان عبد لو.
- 27 ووسع حدود يافث، ويسكن فاخيام سام ويعود كنعان عبد لو.
- 28 وعاش النبي نوح عاكب الطوفان 350 سنة.
- 29 والين اتوفا النبي نوح كان عندو 950 سنة.

10

بداية العالم

أمم العالم

- 1 هاذي لائحة بسجل اولاد سام وحام وياث اولاد النبي نوح، اللي خلطوهم عاكب الطوفان.
- 2 اولاد يافث هو ما جومر وماجوج وماداي وياوان وتوبال وماشك وتيراس.
- 3 وأولاد جومر هو ما أشكاز وريفات وتوجمة.
- 4 وأولاد ياوان هو ما ألبشة وترشيش وكتم ورودانيم.
- 5 ومنهم اتفرعو الناس من قريات اللي اعلى حاشية لبحر اعلى حسب قبائلهم وشعوبهم ولغاتهم.

- 6 وأولاد حام هوما كوش ومصرايم وفوط وكنعان.
- 7 وأولاد كوش هوما سبا وحويلة وسبته ورعمة وسبتكا. وأولاد رعمة هوما شبا وددان.
- 8 وكوش اجبر ول اسمو نمروذ اللي عاد محارب امتين فلارض.
- 9 وكان صياد مانع بفضل الله تعالى. ولذا السبب يكول المثل: كيفت نمروذ هو صياد امتين بفضل الله تعالى.
- 10 وتكونت مملكته فلال أول من مدن بابل وأرك وأكد وكلنة فارض شنعار.
- 11 وعاكب ذاك هاجر شور آشور وابنا مدن نينوى ورحوبوت غير وكالح
- 12 ورسن اللي هي مدينة اكبيرة امبين نينوى وكالح.
- 13 ومصرايم اجبر قبائل لود وعنام ولهاب ونفتوح
- 14 وقتروس وكفتور وكسلوح، ومن كسلوح جاو الفلشطييمين.
- 15 وكنعان اجبر اطفيل اسمو صيدون وهو بكرو وبعدين اجبر حثا،
- 16 وكنعان هو املي بو البيوسيين ولأموريين والجرجاشيين
- 17 والحويين والعراقيين والسنيين
- 18 ولأرواديين والصماريين والحمانيين. وعاكب ذاك اتفرعو اخفاظ قبائل الكنعانيين.
- 19 وامتدو حدود كنعان من صيدون يلين غزة واخظين من جرار، واورا ذاك شور لاشع واخظين من سدوم وعمورة وأدمة وصبويم.
- 20 وهاذو كاملين هوما أولاد حام اعلى حسب قبائلهم ولغاتهم وشعوبهم وبلدانهم.
- 21 وسام هو خويافث لكبير وهو املي اجبر أولاد وهو جد أولاد عابر كاملين.
- 22 أولاد سام هوما عيلام وأشور وأرفكشاد ولود وأرام.
- 23 وأولاد آرام هوما عوص وحول وجاثر وماش.
- 24 وأرفكشاد اجبر شالح وشالح اجبر عابر.
- 25 وعابر اجبر اطفيلين لأول منهم اسمو فالق وهو اللي فأيامو انكسمت لارض. واسم خوه الثاني هو يقطان.
- 26 ويقطان اجبر أولاد هوما الموداد وشالف وحضرموت ويارح
- 27 وهدورام وأوزال ودقلة
- 28 وعوبال وأبجاييل وشبا
- 29 وأوفير وحويلة ويوباب. وهاذو كاملين هوما أولاد يقطان.
- 30 وكانو ساكنين فاراضي لكدا اللي فالشرق اللي امبين ميشع وسفار.
- 31 وهاذو كاملين هوما أولاد سام حسب قبائلهم ولغاتهم وبلدانهم وشعوبهم.
- 32 وهاذو هوما قبائل أولاد النبي نوح حسب انسابهم وشعوبهم ومنهم اتفركو الشعوب فلارض عاكب الطوفان.

11

بداية العالم

اخلاقة لغات العالم

سلسلة نسب النبي نوح يلين النبي أبرام

- 1 وكانت الناس كاملة اللي فلارض تتكلم بلغة وحدة ويستخدمو كلمات يعرفوهم كاملين.
- 2 واخلاق اعلن يلين رحلت الناس شور الشرق جبرو واد فارض شنعار واتسعو فيه.
- 3 وكالو امبيناتهم: وهاو نكبظو الطوب ونشووه بالنار. واستخدمو الطوب بل لحجار ونوع من الطين لمتين بل الطين العادي.
- 4 وكالو: وهاو بنو لروصنا مدينة وبرج يوصل طولو للسما ونعطو لروصنا هوية اياك ما تتفركو فكل جيئات لارض.

- 5 وانزل الله تعالى اياك يشوف لمدينة والبرج اللي كانوا الناس بينوهم.
- 6 وكال الله تعالى: يلين عادو وهو ما شعب واحد ويتكلمو بلغة وحدة، بداو يعدلو هاذا، ماهو لاهي يصعب اعليهم يعدلو أي شي اوخر ينواو يعدلوه.
- 7 نزلوا اصبا وانخلطو لغتهم اياك كلهم ما يفهم لغة لوخر.
- 8 وشتتهم الله تعالى من فم فلارض كاملة ووكيفو عن بناء لمدينة.
- 9 ولذا السبب أسمات لمدينة بابل اللي معناها الله تعالى خلط لغة العالم كامل. ومن فم شتتهم الله تعالى فكل جيهات لارض.
- 10 وهاذي لاحة سبجل أولاد سام: يلين عاد سام عندو 100 سنة اجبر أرفكشاد عاكب الطوفان بسنتين.
- 11 وعاش سام عاكب ذاك 500 سنة واجبر فيها أولاد اخرين وامنات.
- 12 والين عاد عندو أرفكشاد 35 سنة اجبر شالح.
- 13 وعاش أرفكشاد عاكب ذاك 403 سنوات اجبر فيها أولاد اخرين وامنات.
- 14 والين عاد عندو شالح 30 سنة اجبر عابر.
- 15 وعاش شالح عاكب ذاك 403 سنوات اجبر فيها أولاد اخرين وامنات.
- 16 والين عاد عندو عابر 34 سنة اجبر فالق.
- 17 وعاش عابر عاكب ذاك 430 سنة اجبر فيها أولاد اخرين وامنات.
- 18 والين عاد عندو فالق 30 سنة اجبر رعو.
- 19 وعاش فالق عاكب ذاك 209 سنوات اجبر فيهم أولاد اخرين وامنات.
- 20 والين عاد عندو رعو 32 سنة اجبر سروج.
- 21 وعاش رعو عاكب ذاك 207 سنوات اجبر فيها أولاد اخرين وامنات.
- 22 والين عاد عندو سروج 30 سنة اجبر ناحور.
- 23 وعاش سروج عاكب ذاك 200 سنة اجبر فيها أولاد اخرين وامنات.
- 24 والين عاد عندو ناحور 29 سنة اجبر تارح.
- 25 وعاش ناحور عاكب ذاك 119 سنة اجبر فيها أولاد اخرين وامنات.
- 26 والين عاد عندو تارح 70 سنة اجبر أبرام وناحور وهاران.
- 27 وهاذا سبجل أولاد تارح: تارح اجبر أبرام وناحور وهاران، وهاران اجبر لوط.
- 28 ومات هاران سابك بوه تارح فلارض اللي اخلك فيها شور أور الكلدانيين.
- 29 واتعرس كل من أبرام وناحور وكان اسم اعيال أبرام ساراي واسم اعيال ناحور ملكة منت هاران اللي اجبر ملكة ويسكة.
- 30 وكانت ساراي عاكر ما اتخلي التركة.
- 31 واكيط تارح ولو أبرام وول لوط ول هاران وساراي اعيال ولو أبرام وامشاو فابلد من أور الكلدانيين واعدين ارض كنعان. يغير يلين لحك حاران سكتو فم.
- 32 ومات تارح فخاران يلين كان عندو 205 سنوات.

12

بركة أبرام

مولانا يمشي بأبرام شور ارض كنعان

مولانا يسلك أبرام من الجوع ومن المصريين

1 وكال الله تعالى لأبرام: امشي من ارضك وقبيلتك ودار أهلك، وكيس لارض اللي لاهي انتلك.

- 2 ولاهي انعدل منك شعب عظيم، ولاهي انباركك، ولاهي انكبر اسمك، واتعود بركة لناس كاملة.
- 3 والي يباركك يعود امبارك، والي يلعنك يعود ملعون. ولاهي تتبارك القبائل كاملين الي فلارض بسببك.
- 4 وكم أبرام وعدل ذا الي كآلو الله تعالى. وامشات امعاه ساراي اعيالو ولوط ول خوه من حاران. وفذا الوقت كان عندو أبرام 75 سنة.
- 5 وكبظو امعاهم ادبشهم واعبيدهم الي كانو فخاران، وامشاو واعدين ارض كنعان. والين وصلو ارض كنعان،
- 6 عاد أبرام يمشي من ابليدة شور ابليدة يجول فكنعان يلين اوصل لبليدة الي فيها صدراية اكبيرة اسمها موري الي خارج مدينة شكيم الي ساكنين فيها الكنعانيين فذاك الوقت.
- 7 واظهر الله تعالى لأبرام، وكآلو: لاهي نعطي هاذي لارض لنسلك. وكم أبرام وابنا فم مذبح، ويكدم فيه اذبايح لله تعالى الي اظهرلو.
- 8 وعاكب ذاك امشا من هاذي لبليدة واعد كدية فحبة الشرق من لبليدة الي اظهرلو الله تعالى فيها. وابنا خيمتو امبين بيت إيل الي فالغرب ومدينة عاي الي فالشرق. وابنا فم مذبح لله تعالى وصلى فيه.
- 9 ومن فم كيم ماشي واعد النقب الي فالجنوب.
- 10 والين خلكت جفاف فارض كنعان، كم أبرام وامشا واعد مصر يسكن فيها شي من الوقت بيبي الجفاف كانت امتينة فلارض.
- 11 والين كرب من مصر كآل لساراي اعيالو: آنا نعرف اعلتك امرة زينة،
- 12 والين يشوفوك المصريين لاهي يكلو عنك اعيالي، ويكولوني، ويمشويك امعاهم.
- 13 كويلهم اصا عنك اختي ونسلكو من المشاكل ونجبرو العافية بسببك انتي.
- 14 والين ادخل أبرام مصر شافو أهل مصر اعلن اعيالو امرة زينة.
- 15 وشافوها املي عمال فرعون وخبرو فرعون بجمالها، وامشاو بيها شور قصره.
- 16 ولا ابخل شي من شي متعدل لأبرام بسبب ساراي، واعطاه لغنم ولبكر ولحمير ولعبيد ولخدم والبل.
- 17 يغير ما ابطا فرعون يلين ابلاه الله تعالى هو وأهلوه بامراض خطيرة بسبب اعلنو اكبظ ساراي زوجة أبرام وحاول يتعرض امعاه.
- 18 وكم فرعون ومشا لأبرام يجيه وكآلو: اتنا ذا الي عدلتني شنهو؟ اعلاش ما اتكولي اعلنها اعيالك؟
- 19 اعلاش اتكولي اعلنها ختك اياك نكبظها وتنجيم امعاه؟ ظرك اصا اسمع، اكبظ اعيالك وامرل بيها.
- 20 وكم فرعون ووصا اعليه اروا كيج يصيفطوه هو واعيالو وكل أملاكو.

13

بركة أبرام

أبرام يعطي لأول خوه ارض زينة

- 1 وامشا أبرام من مصر وامعاه ساراي ولوط وكل أملاكو شور النقب فكنعان.
- 2 وكان أبرام عندو ياسر من الحيوان والفضة والذهب.
- 3 وامشا من النقب شور بيت إيل إلى لبليدة الي كبط ابنا فيها خيمتو فولول، الي امبين بيت إيل وعاي.
- 4 وهاذي هي لبليدة الي فيها مذبح مولانا الي كبط ابنا. وفم صلى لله تعالى.
- 5 وكان املي لوط الي امشا مع أبرام عندو لغنم ولبكر ونليام.
- 6 وامتلات لارض من أملاكهم يلين ما اتلا فم بل امنين يعيشو فيه فبلد.

- 7 وخلصت اخصومة امين رعيان أبرام ورعيان لوط فالوقت الي كانوا يعيشو فيه الكنعانيين والفرزيين فلارض.
- 8 وكال أبرام للوط : ما يالتنا نتخاصمو امييناتنا، ولا يالتهم يتخاصمو رعياننا بيبي لنا خوت،
- 9 ولارض واسعة كدامك. خلينا تتفاصلو. واين تمشي اعلى زرك العربي، ثمشي اعلى زري العسري. واين تمشي اعلى زرك العسري، ثمشي أنا شور زري العربي.
- 10 واتلفت لوط اعلى زرو وشاف واد الأردن كامل يلين صوغر. وكانت لارض املانة من لخطار وكيفت جنة الله تعالى، وتشابه لارض مصر. وهذا كان سابك يهلك الله تعالى سدوم وعمورة.
- 11 واختار لوط لراضو واد الأردن كامل، وامشا شور الشرق. وانفرك كلهم عن صاحبو.
- 12 واسكن أبرام فارض كنعان، واسكن لوط فابلد لخطار، وابنا اخيامو اكريب من سدوم.
- 13 وكانو أهل سدوم اشرار وعاصين حته لله تعالى.
- 14 وكال الله تعالى لأبرام عاكب ما امشا عنو لوط: ركب عينيك واتلفت من حولك من لبليدة الي اتنا فيها، الشمال والجنوب والشرق والغرب،
- 15 بيبي هاذي لارض الي اتنا شايف لاهي نعطيهالك ولنسلك إلى الابد.
- 16 ولاهي انعدل نسلك كيفت احصي التراب، إلى عاد آراكاج يكد يحسب احصي التراب يتمكن من عد ذريتك .
- 17 كوم وامشي فطول لارض وعرضها بيبي اعطيتهاك.
- 18 وكام أبرام وارفا اخيامو وابناها احذا اصدر ممرا الي احذا حبرون. وابنا مذبح لله تعالى فم.

14

بركة أبرام

أبرام يسلك شعوب

- 1 وفذاك الوقت اخلك اعن أمرافل ملك بابل وأريوك ملك الأسار وكدرلعومر ملك عيلام وتدعال ملك جويم
- 2 ادايكو امع بارع ملك سدوم وبرشاع ملك عمورة وشناب ملك أدمة وشمثير ملك صبويم وملك بالع الي هي صوغر.
- 3 كلهم اجمع الي عندو من لجنود فواد السديم الي ينكالو لبحر الميت.
- 4 والي كانوا عبيد لكدرلعومر مدة 12 سنة، يغير امبلكو واتكبرو اعليه فالسنة 13 .
- 5 وفالسنة 14 امشا كدرلعومر وأصحابو من الملوك، وغلبو الرفائيين فلبليدة ينكالها عشتروت قرنائم. وغلبو الزوزيين فلبليدة ينكالها هام. وغلبو الإييمين فبطحة قريتايم.
- 6 وغلبو الحوريين احذا كدية سعير يلين بيت فاران الي ماهو ابعيد من انخلوات.
- 7 ومن فم رجعو واعدين مدينة قادش، وغلبو كل لارض الي كانوا فيها قبيلة العماليق. وغلبو املي الأموريين الي كانوا ساكنين فارض حرازون تامار.
- 8 وعاكب ذاك كامو كل من ملك سدوم وملك عمورة وملك أدمة وملك صبويم وملك بالع،
- 9 وادايكو امع كدرلعومر ملك عيلام وتدعال ملك جويم وأمرافل ملك بابل وأريوك ملك الأسار فواد السديم. وكانو أربع ملوك ضد خمسة.
- 10 وكان واد السديم املان من ظايات الطين. وكل من ملك سدوم وملك عمورة حاولو يهربو امع رجالتهم من الحرب يغير وحلو فالطين والي اسلك منهم اهرب شور الكدية.
- 11 وكامو الملوك لخرين الربعة الباكين الي غلبو فالحرب وكبظو كل شي كان فسدوم وعمورة من أملاك واطعام وامشاو.
- 12 وكردو لوط ول خو أبرام الي كان ساكن فسدوم فهاذا الوقت، وكبظو كل شي كان عندو.

- 13 واسلك آراكاج من أهل سدوم وعمورة، وجا لأبرام العبراني ورد اعليه ذا اللي اخلك. وكان أبرام ساكن احذا صدراية اكبيرة اللي فاتراب ممرا، اللي من الأموريين، وهو خو أشكول وعانز، وكلهم أصحاب لأبرام.
- 14 والين اسمع أبرام باعلن ول خوه نجبس، كأم واكبط كل رجالتو اللي اخلاكة وكابرين عندو، واللي كان عددهم 318 آراكاج، وامشا دافع اورا الملوكة الربعة يلين لحك مدينة دان.
- 15 والين عاد ليل، كأم أبرام وكقسم رجالتو اعلى فرق، واهجم اعليهم، واغلبهم، وامشا دافع اوراهم يلين لحكو ابليدة اسمها حوبه اللي هي شمال دمشق.
- 16 واكبط اللي كانتو يملكو، وجاب لوط ول خوه وأملاكو ولعليات ولحايبس نخرين.
- 17 وارجع إبراهيم بعدما اغلب الملك كدرلعومر والملوك نخرين اللي كانوا امعاه. وخاظ ملك سدوم اياك يستقبلو فواد شوى اللي اسمو واد الملك.
- 18 وكان ملكيصادق ملك سالم امع ملك سدوم. واعطا ملكيصادق لأبرام شي من امبورو وشي من عصير العنب. وكان راجل من رجالة مولانا العظيم.
- 19 وبارك أبرام وكالو:
اعليك بركة مولانا العظيم
اللي خلط السما والتراب،
20 والحمد لمولانا العظيم
اللي نصرك اعلى أعدائك.
- واعطاه أبرام العشر من كل شي كان عندو.
- 21 وعاكب ذاك كأل ملك سدوم لأبرام: لاهي نكبط الرواكيح واننا تكبط الباكي.
- 22 وكالو أبرام: احلفت اعلى الله تعالى اللي خلط السما والتراب،
- 23 اعطني ما نكبط أي شي من ذا اللي عندك اياك ما اتكول اعطني اجبرت الخير من عندك.
- 24 ولاني لاهي نكبط من عندك ماهو اللي كالو رجالي. يغير اصا الرجالة اللي امشاو امعاي فالحرب واللي هوما عانز وأشكول وممرا، خليم يجبرو بكرتهم.

15

بركة أبرام

مولانا يعطي لأبرام علامة اعلى اخلاكة اللي لاهي يورثو

- 1 وعاكب يلين خلكت هاذي لمور، كأل الله تعالى لأبرام فلم: لا تخاف من شي. آنا نحميك وأجرك اكبير عندي.
- 2 وكأل أبرام: يا مولانا يا ربي شنهني اصا فائدة الخير اللي تعطيني. آنا ما نجبر لولاد، واللي لاهي يورثني هو أليعازر اللي من دمشق.
- 3 وكأل املي أبرام: اتنا ما اعطيني لولاد وذا هو لعبد اللي اخلاكة عندي لاهي يورثني.
- 4 وكالو الله تعالى: ذا لعبد ماهو لاهي يورثك. اللي لاهي يورثك لاهي يوظف من صلبك.
- 5 ووظف الله تعالى أبرام شور كدام خيمتو وكالو: حرص السما واعد النجوم إلى كديت. وكالو الله تعالى: كد عدد النجوم لاهي يعود كد نسلك.
- 6 وصدق أبرام الله تعالى واعتبر الله تعالى أبرام إنسان صالح.
- 7 وكالو: آنا هو الله تعالى اللي جابك من أور الكلدانيين اياك انورثك هاذي لارض.

- 8 وكمال أبرام لله تعالى: ابسيمحالة لاهي نعرف اعلي لاهي نورثها؟
 9 وكمالو الله تعالى: اكيظلي عجلة وعنز وكبش اعمر كل منهم 3 سنوات. وكيظلي املي احامتين.
 10 وكيظهم أبرام وشكهم من الوسط اعلي نصين واجعل كل نص امكابل النص لونها، والطيور ما كسهمهم.
 11 والين كامت الطيور نخلة تنزل وتوكل من الجيفة، صاعهم أبرام.
 12 والين الحلك لمغرب، اركد أبرام ارقاد امتين، وفذا جات اعليه ظلمة امتينة ونخلع.
 13 وكمالو الله تعالى: عود متيقن اعلن نسلك لاهي يتغرب فارض ماهي لهم ، ولاهي يستعدوهم أهلها ويحكروهم مدة 400 سنة.
 14 يغير لاهي النخلص لهم من ذاك الشعب اللي أستعبدهم، وعاكب ذاك لاهي يوخظو بياسر من لأملاك.
 15 واتنا لاهي اتموت فالعافية وتدفن بشيبة صالحة.
 16 وهو ما لاهي يرجعو هون عاكب أربع اجيال . بيهي اثم الأموريين اللي ساكنين هون ما فات عادت ياسرة اياك يعاقبهم الله تعالى اعليها .
 17 والين غربت الشمس وجات الظلمة، اظهر اعمود من الدخان واشهاب من النار واخظين امين طشات اللحم.
 18 وفذاك اليوم عدل الله تعالى عهد امع أبرام وكمالو: لاهي نعطي هادي لارض لنسلك من نهر مصر إلى نهر لكبير، نهر الفرات،
 19 ابلاد القينيين والقنزيين والقدمونيين
 20 والحثيين والفرزيين والرثانيين
 21 ولأموريين والكنعانيين والجرجاشيين واليبوسيين.

16

بركة أبرام

اعيال أبرام اتلود للورث من خلال هاجر

اخلافة إسماعيل لأبرام

- 1 وساراي اعيال أبرام كانت امرة عاكر. وكانت عندها خادم مصرية اسمها هاجر.
 2 وكلات ساراي لأبرام: الله تعالى ما اعطاني الذرية. كقوم اصا اتكي امع هاجر. يكان الله تعالى يعطيني ذرية منها. وعدل أبرام
 3 والي كالتلو ساراي اعيالو.
 4 وكلات ساراي واعطاتو خادمها وعاشرها. وهذا اخلك عاكب ما قضاو 10 سنوات فارض كنعان.
 5 وعاشر أبرام هاجر وحملت منو . والين عرفت أنها حملت، عادت تحكر عريبتها ساراي.
 6 وفذا كلات ساراي لأبرام: الله تعالى يحاسبك اعلي ذا اللي اخلكلي. عاكب ما اعطيتك خادمي وحملت منك، عادت تحكرني.
 7 الله تعالى يقضي بيني وبينك.
 8 وجاوبها أبرام وكالها: هادي خادمك كدامك وعدليلها اللي اتدوري. وعذبت ساراي هاجر يلين هربت اعليها.
 9 واجبرها ملاك الله تعالى اكريب من ظاية الماء فطريك اللي واعدة مدينة اسمها شور.
 10 وكالها ملاك الله تعالى: يا هاجر يا خادم ساراي، من امنين جاية؟ وامنين واعدة؟ وكالتلو هاجر: أنا اهربت من عريبيتي ساراي.
 11 وكالها ملاك الله تعالى: رجعي شور عريبتك وسمعيها.
 12 وكالها املي: لاهي انكثرت نسلك يلين يعود ما يكد ينعده.
 13 وكالها املي: انتي موجوعة ظرك ولاهي تبرا اعلي اطفيل، ولاهي اتسميه إسماعيل اللي معناه الله تعالى يسمع. بيهي الله تعالى حس بالامك.

- 12 واطفيلك لاهي يعود آرا كچاج امتين وامعادي الناس كاملة والناس كاملة امعاديتو. ولاهي يعود آرا كچاج مستحرش ومتكبر اعلى اخوتو كاملين.
- 13 وحمدت هاجر الله تعالى اللي شافها وحس بالاماها وكالت: آنا شفت ظرك اللي يراعي فيّ .
- 14 ولذلك أسمات هاذي الحاسي باسم: حاسي الحلي اللي يراعي فيّ. وهاذي الحاسي هي موجودة امبين قادش وبأرد.
- 15 وعاكب ذا خلات هاجر لأبرام ولو. وسما أبرام اطفيلو اللي من هاجر باسم إسماعيل.
- 16 وكان أبرام فذا الوقت عندو 86 سنة.

17

بركة النبي إبراهيم

مولانا يبارك النبي أبرام باسم اجديد هو إبراهيم

مولانا يعدل ازيانة هي علامة عهدو

- 1 والين عاد أبرام عندو 99 سنة اتجلاؤ الله تعالى وكالو: آنا هو مولانا القادر، امشي كدامي بطريك امسكمة.
- 2 ولاهي انعدل عهدي امعاك وانكتر نسلك حته.
- 3 وكام أبرام واسجد كدام مولانا. واتكلم امعاه مولانا وكالو:
- 4 اراعيني لاهي انعدل عهدي امعاك ولاهي اتعود بو ياسر من لأمم.
- 5 ومن ظرك ما اتلا ينكالك أبرام اللي معناه ابو لمعظم ، يغير لاهي ينكالك النبي إبراهيم اللي معناها بو ياسر من لأمم. ببلي لاهي انعدلك منك ياسر من الشعوب.
- 6 ولاهي اتعود آرا كچاج فايديتو ياسرة، ولاهي يتفرع من نسلك ياسر من الشعوب، ولاهي يوخظو من نسلك ملوك.
- 7 ويعود عهدي إلى الأبد امبيني وبينك وبين نسلك عاكبك جيل اورا جيل. وانعودلك إله ولنسلك من بعدك
- 8 ونعطيك اتنا ولذريتك من بعدك ارض كنعان كاملة، اللي اسكنتها متغرب، لكم الدهر كاملو وانعود لإههم.
- 9 وكال مولانا للنبي إبراهيم: احفظ عهدي اتنا وذريتك من عاكبك مادامو حيين.
- 10 هاذا هو لعهد اللي امبيني وبينك وامبين ذريتك من بعدك اللي يالتم تحفظوه: يُزيّنو الذكور كاملين اللي عندكم .
- 11 اتزيّنو كل اذكوركم كاملين واتعود علامة لعهد اللي امبيني وامبينكم.
- 12 اتموزيّنو اذكوركم كاملين من بو 8 أيام اسوا من ذريتك وللا من ذرية حد مشري من فظتك ماهو من نسلك.
- 13 ياللة يُزيّن كل اطفيل اخلاكة فدارك وللا مشري بالفضة، واتعود علامة عهدي إلى الأبد فلحمكم .
- 14 واذكر اللي فيكم ما أزيّن ينصاع من دار أهلو ببلي خالف عهدي.
- 15 وكال مولانا للنبي إبراهيم: وساراي اعيالك لا تيت اتكولها ساراي من ظرك، يغير لاهي يعود اسمها سارة اللي معناها لأميرة.
- 16 ولاهي انباركها، ولاهي نعطيك اطفيل منها، ولاهي انباركها وانعداها أم لياسر من الشعوب. ومنها لاهي يوخظ ملوك.
- 17 واسجد النبي إبراهيم واضحك وكال امبينو امع راصو: اثرو يصح يخلك اطفيل لراجل بو 100 سنة ؟ واثرو يصح تبرا سارة وهي أم 90 سنة ؟
- 18 وكال النبي إبراهيم لمولانا: وإسماعيل ياريتو يُحظر من بركتك .
- 19 وكالو مولانا: اللي لاهي تبرا هي سارة اعيالك، ولاهي يخلكك منها اطفيل، واتسميه إسحاق. لاهي انعدل عهدي إلى الأبد امعاه وامع ذريتو من بعدو.

- 20 أما اصا إسماعيل فأستجبت لطلبك لو. لاهي انباركو حتة، ولاهي يعود فايدتو ياسرة، ولاهي انكثر نسلو، ولاهي يعود بو
لثاني عشر رئيس. ويعود شعب اكبير.
21 يغير عهدي لاهي يعود امع إسحاق الي لاهي يحي من سارة كيف هاذا الوقت من السنة الجاية.
22 والين اوفنا مولانا من لكلام امع النبي إبراهيم امشا عنو.
23 وفذاك النهار اكبظ النبي إبراهيم ولو إسماعيل والذكور كاملين الي خلپكو فدارو والذكور كاملين الي اشرا، وزيهم، وعدل
ذا الي كآلو مولانا.
24 وكان النبي إبراهيم عندو 99 سنة وقت ازيانتو.
25 وإسماعيل ولو وقت ازيانتو عندو 13 سنة.
26 وتمت ازيانة النبي إبراهيم وإسماعيل
27 والذكور كاملين الي خلپكو فدارو واذكور كاملين الي اشرا فنفس اليوم.

18

بركة النبي إبراهيم

النبي إبراهيم يتشفع لسدوم وعمورة

- 1 وعاكب ذاك اظهر الله تعالى للنبي إبراهيم عند صدرية ممرا، وقت الي كان كاعد كدام فم خيمتو لپكايلة.
2 وفذا ركب وجهو وشاف اثلث رجالة ماشين اعلى جيهتو، وادفع شورهم اياك يرحب بيهم. والين لحپكم، كآم واسجد اعلى
التراب إحترام لهم.
3 وكآل: يا شيخخي إلى عدت شايف عن عبدك يستحق الشرف عنك تستراح عندو، لا تتخطاه.
4 وخليني انجيب لكم شي من الماء تغسلو بيه كرعكم وتكعدو تحت ظل الصدرية.
5 وانجيب لكم شي من امبورو توكوه ومن فم تواصلو مشيكم واتعودو خظتو اعلى خيمة عبدكم. وكآلولو: ما فم مشكلة، عدل ذا
الي كآل.
6 وادفع النبي إبراهيم واعد خيمتو الي فيها سارة وكآلها: كپومي بالعجلة وعجني 3 كيات اكار من الدكيك الزين وخبزهم.
7 وكآم النبي إبراهيم وادفع شور امراحو واكبظ اعجل اسمين واعطاه لجديع عندو ينصبو.
8 وعاكب ذاك اكبظ النبي إبراهيم شي من الزبدة ولبن ولعجل الي انطبخ، واطرح ذا كدامهم، واپكا واكف كدامهم يخدمهم
تحت الصدرية وهو ما يوكو.
9 وكآلولو: وينهي اعيلك؟ كآلم النبي إبراهيم: اراعيا فالحيمة.
10 وكآل واحد منهم للنبي إبراهيم: لاهي نرجعلك فهاذا الوقت من السنة الجاية ولاهي اتعود سارة عادت باطفيلها منك. وذا
الوقت كانت سارة واكفة اوراه عند فم الحيمة وسمعت اكلامهم.
11 وكان النبي إبراهيم وسارة اكهولة اكار فالسن واتخطات سارة سن لحمل.
12 وظحكت سارة امينها امع راصها وكآلت: عاكب ما استكملت وعاد راجلي شيباني نجبر العيال؟
13 فذا كآل الله تعالى للنبي إبراهيم: اشواسا سارة تضحك واتكول: انكذ نبرا اعلى اطفيل وآنا كهلة؟
14 الله تعالى اثرو يكلبو شي؟ لاهي نرجعلك فهاذا الوقت من السنة الجاية واتعود سارة عادت باطفيلها منك.
15 وانخلعت سارة ونكرت اعلمها ظحكت. وكآلها الله تعالى: ماهي حك انتي اضحكتي اچال!
16 وعاكب ذاك كآمو الرجالة الثلاثة ماشين اعلى جيهة سدوم، وامشا امعاهم النبي إبراهيم يسيفطهم.
17 وكآل الله تعالى الي هو واحد من الرجالة الثلاثة: ما انكذ نوجد عن إبراهيم الي ناوي انعدل لسدوم.
18 وإبراهيم لا بد من يعود بو شعب اكبير وامتين وتبارك شعوب لارض كاملة بسببو.

- 19 يبلي أنا هو اللي اخترتو اياك يوصي أولادو وأهلوه من بعدو اياك يحفظو الطريك الله تعالى، امعدلين البر والعدل يلين يعدل الله تعالى اللي اتعهد بيه للنبي إبراهيم.
- 20 وكمال الله تعالى: الخثرة الشكوى والظلم اعلى أهل سدوم وعمورة وشرهم زاد اعلى حدو.
- 21 لاهي انكيسهم وانشوف إلى عاد ذا حك وبتأكد بنفسي.
- 22 وامشاو الرجالة اللي كانوا مع الله تعالى واعدين سدوم، وابكا النبي إبراهيم واكف مع الله تعالى.
- 23 وكرب النبي إبراهيم منو وكالو: لاهي تهلك الصالح مع الشرير؟
- 24 يلين تجبر فذي لمدينة 50 آرکاج صالحه لاهي تهلكها وللا لاهي اتساعها اعلى أساس هاذو الخمسين الصالحين؟
- 25 انتا اعظم من اللي اتخلط امبين الصالح والشرير، ويعود الصالح كيف الشرير حشاك. ما يصح اعلنك انتا الديان ما تعدل؟
- 26 وكمال الله تعالى للنبي إبراهيم: يلين نجبر فسوم الا 50 آرکاج صالحه اتساع الباكين.
- 27 وكمال النبي إبراهيم: أنا كثرت من لكلام مع الرب اعلى مخلوق من التراب والرماد.
- 28 وخالتم نقصو 5 اروا كيج صالحين لاهي تهلك لمدينة اعلى أساس 45؟ وكالو: يلين نجبر فيها 45 صالحين ما نهلكها.
- 29 وكالو النبي إبراهيم مرة ثانية: وخالتم اجبرت الا 40 آرکاج صالحه؟ وكالو: ماني لاهي نهلكهم اعلى أساس 40 الصالحين.
- 30 وكمال النبي إبراهيم: لا تنفك اعلى واسمعي تتكلم، وخالتمك اجبرت الا 30 صالحين؟ وكالو: ماني لاهي نهلكها إلى اجبرت فيها 30 صالحين.
- 31 وكمال النبي إبراهيم: أنا نعرف اعلى كثرت لكلام امعاك، يغير خالتمك اجبرت الا 20 صالحين؟ وكالو: ماني لاهي نهلكها يلين نجبر فيها 20.
- 32 وكمال النبي إبراهيم: لا تغضب اعلى يا رب إلى اتكلمت وكتلتك إلى اجبرت فلهدينة الا 10 صالحين؟ وكالو: ماني لاهي نهلكها إلى اجبرت فيها 10.
- 33 وعاكب ما اوفاه الله تعالى من لكلام مع النبي إبراهيم، امشا وارجع النبي إبراهيم شور بلو.

19

بركة النبي إبراهيم

ول خو إبراهيم يسلك من أهل سدوم

- 1 وجاو الملائكة لأثنين لمدينة سدوم مع اغروب الشمس. وذا الوقت كان لوط كاعد احذا بوابة سدوم. والين شافهم كأم واكف واعدهم يستقبلهم، واسجد بوجهو اعلى التراب إحترام لهم.
- 2 وكال: يا شيوخي استراحو وباتو فدار عبدكم اياك اتقضو ليلتكم وتغسلو كرعكم، وامع الصباح اتواصلو اطريركم. وكالو: ابدي لاهي اتقضو ليلتنا لكدام.
- 3 يغير لوط الح اعليهم يلين يكلو يمسا امعاه وبياتو فدارو. وعشاهم واخبرهم امبورو وكالو.
- 4 وسابك يركدو اجتمع اعليهم اكهولة وفكاريج مدينة سدوم كدام الدار.
- 5 وعيطو لوط وكالو: وين هوما الرجالة اللي بايتين عندك الليلة؟ وخظهم شورنا اياك انلوطوهم.
- 6 وخاظ شورهم لوط واكفل الباب اوراه
- 7 وكال: لا اتعدلو المعصية يا خوتي.
- 8 اراعي عندي منتين اعزيبات. لاهي انوخطهم لكم اياك اتعدلو امعاهم اللي تبغو. أما اصا ذو الرجالة لا اتعدلوهم شي ما ينفع ببلي ضيوف عندي.

- 9 وكالولو: الحز ابعيد عنا ! وكالو املي: ذا آر كاج الي جا يسكن عندنا عاد هامو يتحكم فينا. ظرك اصا لاهي انعدلوك شي أطم منهم هوما. واتكدمو واعدن لوط لاهي يدكدكو الباب.
- 10 فذا الرجالة الي هوما خطار لوط مدو ايديهم وحكموه ودخلوه وسط الدار، وكفلو الباب.
- 11 وخبطو بلعما اروا كيج الي كانوا واكفين كدام الباب، اصغيرهم واكبيرهم، يلين عاد قالبهم يجبرو بل امنين الباب.
- 12 وكالو الرجالة لأثنين لوط: مندرا يكان عندك أقارب فلهدينة: انساب وللا أولاد وللا امنات وللا أي آرا كاج اوخر اكريب منك؟ وخطهم من هادي لمدينة
- 13 بيبي لنا هاما اندرو هادي لبليدة بيبي كثرة الشكوى من شرها عند الله تعالى، وارسلنا اياك اندروها.
- 14 وامشا لوط يعلم الرجالة الي كانوا لاهي يتخيمو امع امناتو وكالهم: كپومو الفولك واوخطو من هادي لبليدة بيبي الله تعالى لاهي يدمر هادي لمدينة. ولا جد اعليهم اكلامو.
- 15 والين عاد الفجر الحو الملائكة لأثنين اعلى لوط وكالولو: كپوم الفولك واكبط اعيالك وامناتك الي امعاك اياك ما تهلك بسبب اثم أهل لمدينة.
- 16 يغير يلين ابطا لوط حكمو الرجالة بايديه وايدن اعيالو وامناتو وامشاو بيهم شور كدام لمدينة بيبي الله تعالى اشفق اعليهم.
- 17 والين وخطوهم ابعيد كال واحد من الملائكة للوط: سلك روحك ولا اتخرص اوراك ولا توكف فذي لبليدة كاملة. اهرب اعلى جيمة لكدا اياك تسلك.
- 18 وكال لوط: لا اتواسلي ذاك يا شيخي،
- 19 اتنا اعرفتي شي واهتمت بي وسلكتني من الموت. يغير آنا ما انكد نلجا فللكا خايف من يخلطلي شي وانموت.
- 20 اراعي مدينة اكريب انكد نهرب شورها. وهي مدينة اصغيرة وخليني نلجا شورها. امالها مدينة اصغيرة حته؟ وانكد نسلك فيها بروحي؟
- 21 وكالو الملاك: آنا اچلت طلبك ولاني لاهي اندمر ذي لمدينة الصغيرة.
- 22 اهرب شورها بالعجلة بيبي ما انكد انعدل شي لسدوم سابك توصل اتنا لهادي لمدينة الصغيرة. ولهذا السبب أسمات هادي لمدينة باسم صوغر الي معناها الصغيرة.
- 23 والين ظهرت الشمس اعلى لارض، الحلك لوط صوغر.
- 24 وفذا امطر الله تعالى اعلى سدوم وعمورة كبريت ونار من السماء.
- 25 واحرك الله تعالى ذيك لارض والي ساكنين فيها والوديان الي حذاها وكل ارضهم كاملة الي محروثة.
- 26 واتلفتت اعيا لوط الي كانت اوراه بيها اكييظ لقبه واتحولت شور اعمود من الملح .
- 27 وامشا النبي إبراهيم امع الصباح شور لبليدة الي وكف فيها كدام الله تعالى.
- 28 ونخرص اعلى جيمة سدوم وعمورة واعلى لارض الي امجاورتهم وشاف الدخان طالع اعلى شكل اعمود.
- 29 وعاكب ما دمر مولانا هادي لبليدة، ما انسا وعدو للنبي إبراهيم ووظ لوط سابك يدمر لمدينة الي كان ساكن فيها.
- 30 وعاكب ما دمر مولانا سدوم وعمورة، امشا لوط وامناتو من صوغر، واسكنو فللكا بيبي كان خايف من السكن فصوغر.
- والجا هو وامناتو فامغارة فالكدية.
- 31 وكالت منتو لكبيرة لختها الصغيرة: نحنا بونا يستكهل ولارض ما اتلاو فيها رجالة يتخيمو امعانا كيف الناس كاملة.
- 32 اتعالي اصا نسكوه شي من الخمر وتكوا امعا اياك ما تنكطع ذرية بونا.
- 33 واسكوا الخمر لبوهم فذيك الليلة، وكامت المنت لكبيرة واتكات امعا . ولا حس لوط بتكيا امعا ولا ايكماها.
- 34 وفانهار الي اوراه كالت المنت لكبيرة لختها الصغيرة: آنا اتكيت امع بوي البارح . وهاي نسكوه الخمر هادي الليلة املي وتدخلي شورو اتني وتكيا امعا، ونجبرو من بونا ذرية.

- 35 واسكوا بوهم الخمر فذي الليلة الثانية وكامت المنت الصغيرة واتكات امعاه. ولا حس لوط بتكيها امعاه وللا ايكامها.
 36 وبهاذا السبب حملو امنات لوط من بوهم.
 37 وبرات المنت لكبيرة اعلى اطفيل سماتو مؤاب اللي معناه من بوي، وهو بو قبيلة المؤابين إلى اليوم.
 38 والمنت الصغيرة ابرات املي اعلى اطفيل وسماتو بن عمي اللي معناه ول أهلي، وهو بو قبيلة بني عمون إلى اليوم.

20

بركة النبي إبراهيم

مولانا يسلك اعيال النبي إبراهيم

النبي إبراهيم يصلي من أجل اسلاكة شيخ الفلشطييين

- 1 وارحل النبي إبراهيم من فم واعد ارض النقب اللي فالجنوب واسكن امبين مدينة قادش ومدينة شور وقضا شي من الوقت فمدينة جزار.
 2 وفم كأل النبي إبراهيم عن سارة اعيالو: هاذي اختي. وارسل أيمالك ملك جزار امراسيل يجيبولو سارة .
 3 واتجلا مولانا لأيمالك فحلم فالليل وكألو: اتنا لاهي اتموت بسبب اعلتك اكبضت امرة متخيمة .
 4 يغير أيمالك لحكوكا ما فامات امسها وكأل لمولانا: لاهي تكلفني وتكفل أمة بريئة؟
 5 امالو كألّي اعلنها اختو وهي املي كألتي اعلنو خوها؟ ما عدلت ذا اللي عدلت يكون شاك اعلنو صالح ونيتي كانت زينة .
 6 وكألو مولانا: آنا نعرف اعلتك نيتك كانت زينة ، ولذاك امنعتك من اطيح فالمعصية واتمس سارة.
 7 ظرك اصا رجع للرجال اعيالو بيهلي هو نبي، اياك يطلبك مولانا وتحياء. وإلى ما رجعتها اعرف اعلتك اتنا وذا اللي لك ميتين قطعاً.
 8 وبكر أيمالك امع الصباح وعيط لعبيدو كاملين، ورد اعلهم ذا اللي اخلك، وانخلعو كاملين خلعة امتينة.
 9 وعيط أيمالك للنبي إبراهيم وكألو: اللي عدلتنا شنهو؟ شنهو اخطأ اللي عدلتك اياك اتجيبلي واتجيب لمملكتي هاذا الذنب لكبير؟ اتنا عدلتني شي خاسر ما كان يالتك اتعدولي.
 10 وسول أيمالك النبي إبراهيم: اشخلاك اتعدل هاذا ؟
 11 وكألو النبي إبراهيم: آنا عدلت ذا اللي عدلت بيهلي شكيت اعلن هاذي لبليدة ما فيها حد خايف من مولانا، وخفتكم تكلفوني اعلى أساس اعيالي.
 12 وفلحقيقة هي اختي منت بوي ولا هي منت أمي واتعرست امعاه.
 13 والين ادعاني مولانا اياك تمشي عن دار بوي، كلفها: بل امنين تمشو كولي اعلي خوك واتعودي عدلتلي غاية اكبيرة.
 14 واكبض أيمالك اغم وابكر واعبيد واخدم واعطاهم للنبي إبراهيم، ورجعلو سارة اعيالو.
 15 وكأل أيمالك: هاذي ارضي كدامك واسكن بل امنين تبغي فيها.
 16 وكأل لسارة: اراني اعطيت نخوك ألف كطعة من الفضة . انبرئك بيها من لإساءة كدام الناس اللي امعك، وانتي بريئة كدام كل واحد. وابهاذي الطريقة اتعود رجعتك كرامتك.
 17 واطلب النبي إبراهيم مولانا اياك يشفي أيمالك. وبرات اعيالو وخدمو
 18 بيهلي مولانا ابلا اعيال وكل اخدم أيمالك بلعكار بسبب سارة اعيال النبي إبراهيم.

21

بركة النبي إبراهيم

مولانا يسلك النبي إسماعيل

النبي إبراهيم يعدل عهد سلام امع الفلشطييين

- 1 وعاكب هاذي لحدات انعم الله تعالى اعلى سارة واعطاها ذا الي وعدها بيه.
- 2 وحملت سارة وابرات اعلى اطفيل لإبراهيم فنفس الوقت الي كبط كآلو مولانا. وكان النبي إبراهيم فذا الوقت مستكهل حته.
- 3 وكام النبي إبراهيم وسما اطفيلو الي اجبر من سارة إسحاق.
- 4 وكام زينو فاليوم الثامن كيف ما اطلب مولانا.
- 5 ووقت اخلاكة إسحاق كان النبي إبراهيم عندو من لعمر 100 سنة.
- 6 وكالت سارة: أنا ضحكني مولانا. وكل الناس الي تسمع ذي الي اخلك يضحكو هوما املي.
- 7 وكالت سارة املي: من كان يكدي يكول للنبي إبراهيم اعلن سارة لاهي اترضع أولاد؟ وراعييني أنا ابريتلو اعلى اطفيل فاستكهيلو.
- 8 واكبر إسحاق وانظم وعدل النبي إبراهيم وقت فظيم إسحاق ندوية اكبيرة.
- 9 وفواحد من انهارات شافت سارة اعلن إسماعيل ول هاجر المصرية يجوق فإسحاق.
- 10 وكالت سارة للنبي إبراهيم: صوع هاذي الخادم هي وولها بيبي ول هاذي الخادم ماني كابلتو يورث امع ولي إسحاق.
- 11 ولا ازيان هاذا عند النبي إبراهيم اعلى أساس ولو إسماعيل.
- 12 وكال مولانا للنبي إبراهيم: لا تنفكع من امردة الطفيل وأمه. واسمع لكلام سارة وعدل ذا الي كاتلك بيبي من إسحاق اتعود لك ذرية.
- 13 ولاهي نجعل من ول الخادم املي أمة اكبيرة بيبي هو من ذريتك.
- 14 وانهار من غد كام النبي إبراهيم امع الصباح واكيط شي من امبورو وكربة ماء واعطاهم لهاجر ودارهم اعلى اكافها وصاعها هي امع اطفيلها. وكيمت ماشة وزهبت نخلوات بثر السبع.
- 15 والين افرق اعليها ماء لكربة، طرحت الطفيل تحت وحدة من الصدرايات.
- 16 وكعدت امكابل 100 متر كدامو بيبي كالت: ما نبغي نخطر الموت اطفيلي. وكعدت تزكي وعادت تبكي.
- 17 واسمع مولانا بكبي الطفيل، وفذا عيط ملاك مولانا لهاجر من السما وكالها: انتي اشفاكعك يا هاجر؟ لا تخافي بيبي مولانا اسمع بكبي الطفيل من لبيدة الي فيها.
- 18 كومي ورفديه وضميه شورك. بيبي لاهي انعدلو أمة اكبيرة.
- 19 وافتح مولانا عينين هاجر ونعلتها حاسي من الماء. وامشات واملات لكربة واسكات الطفيل.
- 20 وكان مولانا امع الطفيل. والين اكبر إسماعيل، اسكن نخلوات فاران وعاد اخباري فارماية السهم.
- 21 وعرستو أمو امع امرة مصرية.
- 22 وفذا الوقت كال أيمالك وقائد جيشو فيكول للنبي إبراهيم: نحنا لاحظنا اعلن مولانا امعك فكل شي اتعدلو،
- 23 واندورك ظرك تحلفلي اعلى مولانا اعلتك مانك لاهي تغدربي ولا تغدر بنسلي ولا أولادي، واحلفلي اعلتك لاهي تعرف شي لشعي الي اتغربت بينهم كيفما أنا احسنت اعليك.
- 24 وكال النبي إبراهيم: راني حاللك.
- 25 وعاتب النبي إبراهيم أيمالك اعلى أساس الحاسي الي كبطوها اعبيد أيمالك بالقوة.
- 26 وكال أيمالك: أنا ما نعرف من اكبط هاذا الحاسي، واتنا املي ما كبتلي من اكبطها. وأول مرة نسمع بذا هو اليوم.
- 27 وفذا اعطا النبي إبراهيم لأيمالك اغنم وابكر واكطع كلهم امع لوخر عهد.
- 28 وعزل النبي إبراهيم اسبع انعاج من غنمو اعلى زر.
- 29 وكآلو أيمالك: شنهبي الغاية من اعزبل هاذا اسبع انعاج وحدهم؟

- 30 وكألو النبي إبراهيم: ها ذو اسبع انكدمها بين ايديك تشهد اعلي أنا هو اللي احفرت ها ذي الحاسي.
 31 ولهذا السبب سما ها ذي لبليدة بئر السبع الي معناها حاسي الحلفة. بيبي أيمالك والنبي إبراهيم كل واحد منهم احلف فم.
 32 وبها ذي الطريقة كقطعوا لأثنين عهد امبيناتهم فبئر السبع. ومن فم كأم أيمالك وفيكول قائد جيشو ورجعو شور ارض
 الفلشطييين.
 33 واغرس النبي إبراهيم نوع من الصدر كيف الككات فبئر السبع وصلى فم لله تعالى للإله الي كان موجود سابك كل شي.
 34 واسكن النبي إبراهيم فارض الفلشطييين ياسر من الزمن.

22

بركة النبي إبراهيم

مولانا يبارك النبي إبراهيم اعلي أساس طاعتو للتضحية بولو إسحاق

- 1 وبعد يلين اسكن النبي إبراهيم فارض الفلشطييين، كأم مولانا وأمتحن النبي إبراهيم وعيطلو: يا إبراهيم ! وكال النبي إبراهيم:
 اراعيني يا مولانا.
 2 وكال مولانا للنبي إبراهيم: اكبظ ولك إسحاق الي امعاك والي تبغي، وامشي شور ارض المريا، وذبحو فم، وحركو، وكدمو
 كيفت قربان اعلي وحدة من ذوك لكدا الي لاهي انعتك.
 3 وانهار من غد اوعا النبي إبراهيم امع الصباح واحزم اعلي احمارو، وامشا امعاه ياثنين من اعبيدو وامعاهم ولو إسحاق، وجهاز
 لحطب اياك يحرك اعليه القربان، وامشا اعلي جبهة لبليدة الي كآلو مولانا.
 4 وانهار الثالث ركب النبي إبراهيم وجهو وشاف لبليدة الي كآلو مولانا من اعبيد.
 5 وكال النبي إبراهيم للعبيد الي امعاه: ابكاوهون امع لخم اياك نمشي أنا امع الطفيل وانصلو لمولانا، ومن فم نرجعولكم.
 6 وكأم النبي إبراهيم ورفد إسحاق لحطب، وارفد النبي إبراهيم مشعل النار والموس، وامشاو فبلد.
 7 وكال إسحاق لبوه النبي إبراهيم: يا بوي! وكآلو النبي إبراهيم: اراعيني يا ولي. وكآلو: وينو لخروف الي لاهي يخرك كيفت
 قربان؟ بيبي إسحاق شاف النبي إبراهيم عندو النار والموس يغير ما شاف لخروف.
 8 وكال النبي إبراهيم لإسحاق: مولانا لاهي يدبر لخروف الي لاهي يخرك كيفت قربان، لا يشطنك شي. وواصلو مشيهم فبلد.
 9 والين لحكو لبليدة الي كال مولانا للنبي إبراهيم، كأم النبي إبراهيم وابنا فم مذبح، واجمع لحطب، وكثف النبي إبراهيم ولو إسحاق
 ودارو فولك المذبح فولك لحطب.
 10 ومد النبي إبراهيم ايدو واكبظ الموس اياك يذبح ولو إسحاق.
 11 وفذا عيطلو ملاك الله تعالى من السما: إبراهيم إبراهيم! وكال النبي إبراهيم للملاك: اراعيني.
 12 وكال الملاك للنبي إبراهيم: لا اتركب ايدك اعلي الطفيل، ولا اتعدلو أي شي. أنا ظرك اعرفت اعلتك خايف من مولانا،
 ولا اجملت ابولك الوحيد اعلي مولانا.
 13 وخرص النبي إبراهيم اوراه وشاف كبش متعلق باعراش الصدر. وكأم كاسو وجابو وذبحو وحركو القربان بل ولو.
 14 وسما النبي إبراهيم ذيك لبليدة باسم يهوه يراه الي معناه الله تعالى يدبر. ولهذا السبب ينكال اليوم: فكدية الله تعالى يدبر.
 15 وعيط ملاك الله تعالى للنبي إبراهيم من السما مرة اخرا
 16 وكال: راعيني لخلفك بيكلي عدلت ذا الي اطلبت منك ولا احكمت عني ولك الوحيد .
 17 لذاك لاهي انبارك وانكثر ذريتك ويعود عددهم كيفت انجوم السما وكيفت احصي التراب لبحر، ولاهي تورث ذريتك
 مدن اعدائها.
 18 وبذريتك تتبارك جميع أمم لارض بيك الي اسمعتي.

- 19 وعاكب ذاك ارجع النبي إبراهيم شور اعبيدو لأثنين ورجعو كاملين شور بئر السبع بل امنين ساكن النبي إبراهيم.
 20 وانپال للنبي إبراهيم عاكب يلين خلكت هاذو لمور: اراعيا ملكة خلکولها اولاد نخوك ناحور:
 21 عوصا هو لبكر وخوه بوزا وقوئيل بو آرام
 22 وكاسد وحزوا وفلداش ويدلاف وبتوئيل .
 23 واخلك لبتوئيل رفقة. هاذو الثمانية خلاتهم ملكة لناحور خو النبي إبراهيم.
 24 واملي خلاتلو خادمو الي اسمها رؤومة: طابح وجاحم وتاحش ومعكة.

23

بركة النبي إبراهيم

النبي إبراهيم يشرف من خلال الشعوب الي احذاه وقت موت اعيالو

- 1 وعاشت سارة 127 سنة من لعمر.
 2 وماتت فقرية حبرون فارض كنعان. وجا النبي إبراهيم امتكدر اياك ينوح اعلى سارة.
 3 والين كدام النبي إبراهيم من كدام جثمان سارة كمال للحيثيين:
 4 أنا خاطر وضيف عندكم وطالبكم تعطوني اقبر ندفن فيه اعيالي الي ماتت.
 5 وكالولو الحيثيين:
 6 اسع يا شيخنا اتنا مولانا عدلك زعيم بينا، اكبط تدفن اعيالك فازين اقبورنا، ما فينا حد لاهي يحكمك عن تدفن اعيالك فقبرو.
 7 وكام النبي إبراهيم اركع كدام الحيثيين أهل لبلاد يشكرهم.
 8 وكالهم النبي إبراهيم: إلى عدتو تبغوني اصا ندفن اعيالي، فاسمعوني واتوسطولي فعفرون ول صوحر
 9 اياك يبيعي امغارة المكفيلة الي يملك والي اعلى زر احريثتو، ويبيعهالي بسعها كامل اياك انعدلها مدفني.
 10 وفذا الوقت كان عفرون الحيثي كاعد امع اجماعتو وكال للنبي إبراهيم كدام كل الحيثيين الي اجتمعو عند بوابة لمدينة:
 11 لا يا شيخي اسمعني، لاهي نعطيك احريثتي ولمغارة الي فيه هدية مني لك. وشعبي شاهد اعلى ذا، وادفن فيها اعيالك.
 12 واركع النبي إبراهيم يشكر الحيثيين مرة انخرا.
 13 وكال النبي إبراهيم لعفرون كدام الحيثيين: حكلا اسمعني، آنا نبغي ندفن صوكر لحرثة واپكل مني هاذا اياك انكبد ندفن اعيالي فيه.
 14 وجابو عفرون وكالو:
 15 اسمعني يا شيخي، هاذي لارض قيمتها 5 كيلوات من الفضة، وهاذا لمبلغ بلا قيمة بيني وبينك، وادفن اعيالك.
 16 واپكل النبي إبراهيم لمبلغ الي اعرض اعليه عفرون واوزن النبي إبراهيم لعفرون 5 كيلوات من الفضة كدام الحيثيين حسب الوزنة الي متعارف اعليها عند تجارهم.
 17 وصبحت احريثة عفرون الي فالمكفيلة الي اكريب من ممرا ولمغارة الي فيها وكل الصدر الي لحرثة
 18 للنبي إبراهيم وهاذا اشهد اعليه كل الحيثيين الي اجتمعو عند بوابة لمدينة.
 19 وعاكب ذاك كدام النبي إبراهيم وادفن اعيالو سارة فامغارة المكفيلة اكريب من ممرا الي هي حبرون فابلاد كنعان.
 20 واملك النبي إبراهيم من الحيثيين لحرثة ولمغارة الي فيها وعادو مدفلو.

24

بركة النبي إبراهيم

اعيال إسحاق أباركت بسبب أهلها اياك تجبر ياسر من الذرية

- 1 وعاكب فترة من الزمن استكهل النبي إبراهيم حته وباركو الله تعالى فكل شي.
- 2 وكمال النبي إبراهيم لشيخ اعبيدو والي هو مسؤول عن كل شي فدار النبي إبراهيم: دير ايدك تحت كايقي،
- 3 واحلفلي اعلى الله تعالى إله السما ولارض اعلنك ما اعترس لولي أي امرة من أهل كنعان اللي أنا عايش اميناتهم.
- 4 وتمشي شور بلدي ونفطي وتكبط امرة منهم لولي إسحاق.
- 5 وكمال لعبد للنبي إبراهيم: وإلى عادت لمرة اللي لاهي نكبط لإسحاق ما تبغي تمشي شور هاذي لارض ، وفذي الحالة مندرا يكانك تبغيني انجيب إسحاق للبيدة اللي اتنا جاي منها؟
- 6 وكمال النبي إبراهيم: عسك من اترجع ولي لقم.
- 7 الله تعالى إله السما اللي اكبطني من دار بوي ومن وطني وتكلم امعاي واحلفلي وكالي: اندور نعطي هاذي لارض لنسلك. يدور يمشي كدامك ملاك اياك تكبظ امرة لولي من ارض أهلي.
- 8 وإلين ترفض لمرة تمشي امعاك، اتعود اتنا فهادي الحالة عدلت اللي احلفتي اعليه. يغير لا اترجع ولي لذيك لارض.
- 9 ودار لعبد ايدو تحت كايمة النبي إبراهيم واحلف لشيخو اعلنو لاهي يعدل ذا اللي احلفو اعليه.
- 10 واكبظ لعبد 10 اجمال من حيوان النبي إبراهيم ورفد اجمال من كل الخير اللي عند شيخو. وامشا واعد أرام النهرين لبيدة اللي فيها ناحور.
- 11 وإلين بكرب، برك اجمال خارج لمدينة احذا حاسي من الماء. وكان هاذا مع مغرب الشمس، وذا كان وقت وخيظ لعليات اياك يوردو فالحاسي.
- 12 واطلب لعبد وكمال: يا الله تعالى إله شيخي النبي إبراهيم، يسرلي امري اليوم واحسن اعلى شيخي النبي إبراهيم .
- 13 أنا اراعيني واكف عند الحاسي ولعليات هاذي لمدينة لاهي يوخظو يوردو.
- 14 ولمرة اللي انكولها: نزي كدرتك اياك نشرب، وتسبيني وتسبكي اجمالي، اتعود هي لمرة اللي اخترت لعبدك إسحاق. وبهاذي الطريقة اتعود اعرفت اعلنك احسنت اعلى شيخي النبي إبراهيم.
- 15 وسابك يوفي عبد النبي إبراهيم دعاؤو، جات رفقة منت بتؤئيل ول ملكة اعيال ناحور خو النبي إبراهيم وكدرتها اعلى اكتفها.
- 16 وكانت اشوية ازوية حته واعزبية ما كط مسها راجل. وكاست ظاية الماء واملات كدرتها وكيمت ماشة.
- 17 وادفع عبد النبي إبراهيم شورها وكالها: اسبيني اشوي من الماء من كدرتك.
- 18 وكالتلو رفقة: اشرب يا شيخي ونزلت كدرتها بالعجلة اعلى ايديها واسكاتو.
- 19 وعاكب يلين اسكاتو كالتلو: لاهي انجيب املي الماء لاجمالك اياك نسبهم.
- 20 وصبت كدرتها بالعجلة فحوظ الماء ودفعت شور حاسي وتورد الماء يلين اسكات اجمالو كاملين.
- 21 وكان عبد النبي إبراهيم امراقبها فذا كامل اللي اتعدل من دون كلام اياك يعرف يكانها هي اللي اختار الله تعالى لإسحاق وللا ابدى.
- 22 وإلين شربت اجمال، اكبظ لعبد ووخظ حزمة من الذهب وزنها اكريب من 6 اكرامات ووخظ املي أسوارين من الذهب وزنهم 120 اكرام.
- 23 وسول لعبد رفقة وكالها: انتي منت من؟ كولي مندرا يكانا انكدو نجبرو ابليدة انباتو فيها فدار بوك؟
- 24 وكالتلو رفقة: أنا بوي هو بتؤئيل ول ملكة وناحور.
- 25 وكالتلو املي: عندنا لحشيش وياسر من لعلف وعندنا املي بل امنين اتباتو فيه.
- 26 وفذا اركع واسجد لعبد لله تعالى يشكرو.

- 27 وڤال: اتبارك الله تعالى إله شيخي النبي إبراهيم اللي ما امنع كرمه ونزاهتو عن النبي إبراهيم. وڤال لعبد: الله تعالى سهداني اعلى دار اخوت شيخي النبي إبراهيم.
- 28 ودفعت رفقة شور دار أمها وردت اعليها اللي اخلڤ.
- 29 وكان عند رفقة خو ينڤالو لابان. وڤام لابان وامشا واخط شور لعبد اللي عند الظاية
- 30 ببيلي فات شاف حزمة الذهب وأسوارين فايدين اختو رفقة، واسمع املي اكلام رفقة عن لعبد اللي اجبرت، واجبر لابان لعبد واكف احذا اجمالو اڤريب من الظاية.
- 31 وڤال لابان للعبد: اتفضل اتنا امباركك الله تعالى. اعلاش اتنا واكف الڤڤدام؟ آنا جهزت الدار وجهزت املي ابليدة يستراحو فيها اجمالك.
- 32 وڤاس لعبد الدار وانزل لابان وعبيدو اللي كانوا رافدين اجمالو واعطاو لاجمال لعبد لحشيش ولعلف، وجابولو شي من الماء هو والي كان امعاه اياك يغسلو ڤرعيهم.
- 33 وطرحو ڤدامو اطعام اياك يوكل، يغير سابڤ يوكل ڤال: ماني لاهي نوكل سابڤ ما ڤڤكمم اللي عندي. وڤال لابان لعبد النبي إبراهيم: اتفضل ڤول اللي عندك.
- 34 وڤال لابان: آنا عبد للنبي إبراهيم.
- 35 والله تعالى بارك حته شيخي النبي إبراهيم وعاد زعيم. والله تعالى اعطاه لغنم ولبكر والفضة والذهب ولعبيد ولخدم والبل ولحمير.
- 36 وخلاتلو سارة اطفيل عاڤب ما استكهلت واعطاه بوه النبي إبراهيم كل أملاكو.
- 37 واحلفلي شيخي النبي إبراهيم وڤاللي: لا اتعرس لولي إسحاق أي امرة من الكنعانيين اللي آنا ساكن فبلادهم.
- 38 وڤاللي: ڤيس أهل بوي وعاليتي واڤبظ امرة لولي.
- 39 وڤلت لشيخي النبي إبراهيم: وخاللة لمره اللي لاهي نجبر ابات تمشي امعالي شور كنعان؟
- 40 وڤاللي النبي إبراهيم: الله تعالى اللي امشيت آنا اعلى اطريركو يدور يمشي ملاكو ويوفقتك فهمتلك اياك تڤبظ اعيال لولي إسحاق من عائلتي ومن أهل بوي.
- 41 وڤاللي شيخي النبي إبراهيم: وإلى جيت لأهلي ورفضو يعطوهالك، فهاذي الحالة نطلصك من الحلفة اللي احلفتلي اعليها.
- 42 وڤست اليوم الحاسي وإلين الحڤكتها اطلبت الله تعالى ويڤولو: يا الله تعالى إله شيخي النبي إبراهيم، آنا طالبك اتوقفني فاللي اعلى أساسو آنا سافرت.
- 43 آنا اراعيني واكف ڤدام الحاسي. اندورك تجعل الشوية اللي لاهي اتجي اياك توردد الماء واللي يلين نطلب منها: تسڤيني من الماء،
- 44 واتڤولي: اشرب اتنا وآنا لاهي نسڤي اجمالك املي. اتعود هي الشوية اللي اختارها الله تعالى لإسحاق ول شيخي.
- 45 والوقت اللي كنت نطلب فيه مولانا واناجي فيه نفسي، فذا شفت رفقة جاية ورافدة ڤڤدرة اعلى اكافها، وڤاست الحاسي توردد الماء ويڤلها: طالبك تسڤيني.
- 46 ودفعت وطرحت ڤڤدتها وڤاللي: اشرب اتنا ولاهي نسڤي املي اجمالك.
- 47 وسولتها: منت من انتي؟ وڤاللي اعلتها منت بتؤئيل ول ناحور اللي خلاتلو ملڪة. واڤبظت ودرت الخاتم فاخنافرها والسوار فايديها.
- 48 وڤمت واسبجت وباركت الله تعالى إله شيخي النبي إبراهيم اللي سهداني شور الطريك لمسڤمة اياك نڤبظ منت خو النبي إبراهيم لولو إسحاق.
- 49 وظرك ڤولولي إلى عدتو لاهي اتعدلو ذي الغاية لشيخي النبي إبراهيم، وللا طلصوني واخلوني انڤم واعد ابليدة اخرا.
- 50 وڤالولو لابان هو وبتؤئيل: ذي لمردة جات من عند الله تعالى ونحنا ما انڤدو انڤولولك ايهي وللا ابدي.

- 51 رفقة اراعيا كدامك. اكبظها وامشي بيها اياك اتعود اعيال لأول شيخك النبي إبراهيم كيفت ماراد الله تعالى.
- 52 وإلین اسمع عبد النبي إبراهيم اكلامهم، ابرك اعلى التراب ساجد لله تعالى.
- 53 ووظخ لعبد اديار من الفضة والذهب ولباس واعطاهم لرفقة واعطا املي نخوها وأما هدايا غالية.
- 54 وكال واشرب هو ورجالتو وباتو ليلتهم فم. وإلین اوعاو امع الصباح كآلهم: اعطوني اطريك اياك نرجع شور شينخي النبي إبراهيم.
- 55 وكالولو خو رفقة وأما: خلي رفقة تبيكي امعانا 10 أيام ولا ذاك ومن فم تمشي.
- 56 وكآلهم لعبد: لا تحصروني ، الله تعالى سبكي اطريكي ، خلوني نمشي شور شينخي النبي إبراهيم.
- 57 وكالولو: لاهي انعطو لرفقة وانسلوها عن رأياها.
- 58 وعطو لرفقة وسولوها: تبغي تمشي امع ذا الراجل؟ وكآلتهم: اهيه نبغي نمشي.
- 59 وخلاو رفقة تمشي وامشات امعها امرظعتها وعبد النبي إبراهيم ورجالتو.
- 60 وباركو رفقة وكالوها: اعليك بركة مولانا. انتي ختنا عدلي ياسر من الذرية اياك اتعود آلاف مؤلفة وتورث ذريتك مدن اعدائها.
- 61 وكآمت رفقة واخدمها وركبو اجمال وامشاو اورا عبد النبي إبراهيم. وكيم لعبد برفقة ماشي بيها.
- 62 وفذاك الوقت كان إسحاق اللي ساكن فالنقب ارجع من الطريك اللي ينكأها حاسي الحي اللي يراعي في.
- 63 وفدحميساية امشا واعد انخلوات اياك يتخمم . فذا شاف اجمال جاية .
- 64 ورفعت رفقة هي املي عينها وشافت إسحاق، ونكزت عن اجمالها.
- 65 وسولت عبد النبي إبراهيم وكآتلو: منهو هذا الراجل اللي ماشي فالحرث اياك يتكألنا؟ وكألها لعبد: هذا شينخي إسحاق. وكبظت حوليا واتحجبت عنو.
- 66 وعاكب ذاك رد لعبد اعلى إسحاق ذا كامل اللي اخلك.
- 67 ودخل إسحاق رفقة شور خيمة أمو سارة واتعرس امعها وابغاها حتته واتعزا بيها عاكب موت أمو سارة.

25

بركة النبي إبراهيم

- عاكب موت النبي إبراهيم بركتو اتكيس ولو إسحاق
- 1 وعاكب ذا كآم النبي إبراهيم واتعرس امع امرة اسمها قطورة.
- 2 وخلاتو زمران ويقشان ومدان ومديان ويشباق وشوحا.
- 3 وخلا يقشان شبا ودادان ، وأولاد دادان هوما الأشوريم وللطوشيم ولأميم.
- 4 وأولاد مديان هوما عيفة وعفر وحنوك وأيداع وأدعة ، وهادو كاملين جاين من ذرية قطورة.
- 5 وورث النبي إبراهيم للنبي إسحاق كل أملاكو.
- 6 واعطا لولادو من خدمو هدايا وقت محدو كان حي، وارسلهم اعلى جبهة الشرق ابعيد عن ولو إسحاق.
- 7 وعاش النبي إبراهيم 175 سنة.
- 8 ومات النبي إبراهيم بشيبة سالحة وانضم إلى اسلافو.
- 9 ودفنو إسحاق وإسماعيل بوهم النبي إبراهيم فامغارة المكفيلة فحرث عفرون ول صوحر الحيثي اللي احذا ممر.
- 10 وهو الحرث اللي كط اشرا النبي إبراهيم من الحيثيين وفيه اندفنو سارة والنبي إبراهيم فزر بعض.
- 11 وعاكب موت النبي إبراهيم بارك مولانا إسحاق ولو واسكن إسحاق عند الحاسي الحي اللي يراعي في.
- 12 وهادو سبج أولاد إسماعيل ول النبي إبراهيم اللي خلاتو هاجر المصرية خادم سارة لإبراهيم.

- 13 وهاذي أسامي أولاد إسماعيل مرتبة حسب اخلاقتهم: نايوت هو بكر إسماعيل وقيدار وأدبئيل ومبسام
14 ومشماع ودومة ومسا
15 وحدار وتيماء ويطور ونافيش وقدمه.
16 وهاذو هوما أسامي أولاد إسماعيل وعادو الشيوخ للثاني عشر قبيلة فبليدات مختلفة.
17 وعاش إسماعيل 137 سنة ومات وانضم شور اسلافو.
18 واسكن نسلو فبليدة الي امبين حويلة وشور اعلى حدود مصر اعلى الزر الشرقي من مدينة أشور، وكانو اعلى عداوة امع أولاد
عمهم.
19 وهاذا سبج أولاد النبي إسحاق: إبراهيم خلا إسحاق،
20 وكان النبي إسحاق عندو 40 سنة فالوقت الي اتعرس فيه امع رفقة منت بتؤليل لأرامي الي جاي من واد آرام، وكانت خت
لابان لأرامي.
21 وكانت رفقة اعيال النبي إسحاق عاكر. وكام النبي إسحاق واطلبها الله تعالى اياك تجبر الذرية. واستجابو الله تعالى وحملت
رفقة.
22 وادايكو أولادها وهوما مزالو فكرشها، وفذا كالت رفقة: اعلاش يخلكلي ذا؟ وامشات رفقة اتصلي واتسول الله تعالى عن
السبب.
23 وكالها الله تعالى:
فكرشك أمتين ويتفاركو من هاذو لأمتين شعبين ، واحد منهم يكلب لوخر ، وولك لكبير يستعبدو الصغير.
24 والين الحلق وقت بريها ابرات رفقة اعلى اتواما.
25 واخلق لأول احمر واملان من ازغب. وسماوه عيسو الي معناه لمزغب.
26 وعاكب اشواي اخلق خوه، وهو كارد اكراع عيسو. وسماوه يعقوب الي معناه لمخادع . ووقت اخلاقتهم كان النبي إسحاق
عندو 60 سنة.
27 وكبرو التركة وكان عيسو اخباري فالصيد ويبيغي الخلوات. ويعقوب كان عكسو بارد ويبيغي لكعاد فالخيام.
28 وكان عيسو هو لمفضل عند النبي إسحاق بيبي يجبلو من صيدو. وكانت رفقة غالي اعليها يعقوب.
29 وفيوم من لأيام يلين ارجع عيسو من الخلوات فتران، اجبر يعقوب انصب اطعام زين.
30 وكال عيسو ليعقوب: غديني من ذا الطعام لحم. أنا ميت بيّ الجوع. ولهاذا السبب عيسو أسماً أدوم الي معناها لحم كيف
الطعام الي كال .
31 وكال يعقوب لعيسو: لاهي انغديك بشرط اعلك اتبعلي بكوريتك .
32 وكال عيسو ليعقوب: اعلى ذي الحالة أنا لاهي نعكب انموت بالتالي شني الفائدة من بكوريتي؟
33 وكالو يعقوب: احلفلي ظرك . واحلفلو عيسو وبهاذي الطريقة باع عيسو بكوريتو ليعقوب.
34 واعطا يعقوب لعيسو شي من امبورو ولعدس وكال عيسو واشرب وكيم ماشي. وبهاذي الطريقة احتقر عيسو فائدة لبكورية.